

四庫全書

子部

欽定四庫全書

萬姓統譜卷四十二

明 凌迪知 撰

下平聲

七陽

王

望出太原周靈王太子晉之後世傳晉登仙是王家之太子遂稱王氏出北海陳留齊王田和之後出東海姬姓畢公高之後出高平京兆魏信陵君之後天水東平新蔡新野山陽中山章武東萊河東殷王子比干之後又唐王宗隋末改為王氏共二十一望咸以分封食菜而主也太原琅琊二望尤著

周

王蠋齊畫邑人屢諫湣王不聽退而耕于野燕初破齊聞蠋賢將封于萬家蠋固辭曰忠臣不事二君遂

經死齊士聞之曰王蠋布衣也義不北面于燕  
况在位食祿者乎乃求湣王子法章立之是為

襄王

王翦

潁陽人將兵六十萬虜楚王負芻  
以其地置楚郡用兵與白起齊名

王孫滿

楚王伐陸渾戎至洛周使王孫滿勞之楚王  
問鼎大小輕重對曰在德不在鼎周德雖衰  
天命未改鼎之  
輕重未可問也

王詡

周末人受道老君居清  
溪之鬼谷號鬼谷先生

王子喬

名迴周靈王太子晉也好吹笙作鳳鳴遊伊  
洛之間浮邱生接引嵩高山三十餘年後見  
桓良曰告我家七月七日待于緱氏山巔至是  
乘白鶴至山頭望之不得到舉手謝時人數日

而

王良

晉人善御者春  
秋即郵無郵

秦

王賁

秦王政二十一年賁破  
燕太子軍官至通武侯

漢

王陵

沛人始為縣豪高祖微時兄事之及高祖起沛  
陵以兵屬焉天下既定封安國侯高后立諸呂

為王陵為相爭  
之遂以病免

王訢

濟南人有才行武帝時為洛陽令以御史暴勝  
之薦徵為右輔都尉守右扶風視事十餘年有

政績昭帝時代車千  
秋為丞相封宜春侯

王式

字翁思新桃人為昌邑王師以詩朝夕講授至  
于忠臣孝子反覆誦之至于危亡失道之君未

嘗不流淚為王深戒之昌  
邑王廢式得減死論歸家

王望

字慈卿琅琊人為青州刺史值歲荒便宜發倉  
廩賑饑民事畢上言朝廷以望不先表請欲議  
罪鍾離意言望懷義忘罪  
不宜繩之以法乃赦之

王同

字子中琅琊東武人儒林傳云漢興田何以易  
授東武王同子中暨洛陽周王孫丁寬齊服生  
皆著有易傳而同學尤邃淄川楊何廣川孟旦  
魯周霸莒衛胡齊即墨成臨淄主父偃皆受易

於同大  
行於時

王吉

字子陽魯虞人舉賢良為昌邑中尉雖不尊道  
亦知敬禮及王即帝位以淫亂廢昌邑羣臣皆  
誅惟吉以忠直數諫正得免官至諫議大夫謝  
病歸吉與貢禹為友世稱王陽在位貢禹彈冠

言其取  
舍同也

王駿

吉子以孝廉為郎因薦轉諫議大夫累遷京北尹先是京北有趙廣漢張敞王尊王章及駿皆有

能名時稱前有趙張後有三王後代薛宣為御史大夫

王襄

益州刺史欲宣風化於眾庶命王褒頌漢德作中和樂職宣布詩三篇選年少者依鹿鳴之聲

之歌

王渙

邠人少好俠既而改節敦儒學累官洛陽令為政得寬猛之宜及卒宣帝嘆惜之鄧太后謂渙

秉清修之節蹈羔羊之義百姓追思為之立祠子石為郎中

王堂

邠人舉茂才拜巴郡太守吏民生為立祠遷汝南搜才禮士憲章朝明治孫

商博學多聞守蜀郡亦有治聲

王成

為膠東相治甚有聲宣帝褒之曰膠東相成勞徠不怠治有異等賜爵關內侯

王章

字仲卿鉅平人以文學為諫大夫在朝有名敢直言累遷京兆尹劾大將軍王鳳為鳳所害

王尊

字子贛高陽人累遷益州刺史至九折板曰此非王陽所畏道耶叱其馭曰驅之王陽為孝子

王尊為忠臣居部二歲徵外服其威信遷東平相王所為不中度者輒諫止之

王商

字子威蠡吾人父樂昌侯薨商哀不踰禮悉推財以分異母諸弟累官至丞相成帝甚尊重之

單于冬朝見商于未央廷中仰視大畏之却退帝聞而嘆曰真漢相矣

王褒

字子淵蜀人益州刺史王襄令作中和樂職宣布詩因奏褒有軼材上徵之既至作聖主得賢

臣頌上令往益州祠金馬碧鷄之神道病卒宣帝朝為諫大夫

王昌

成帝建始三年南陽太守王昌為右扶風

王崇

駿子以父任為郎歷刺史郡守治有能名建平中為御史大夫平帝初拜大司空封扶平侯時

王莽秉政崇謝病避莽就國卒自吉至崇世以清廉名

王扶

字子元掖縣人少修節行客居不其所在人化其德太傅鄧禹辟致之杖策歸鄉里後拜議郎

永平中劉復著漢德頌盛稱扶為名臣

王琳

汝南人年十餘歲父母俱喪遭亂舉鄉逃竄唯琳兄弟獨守塚廬號泣不絕弟季出遇赤眉將

殺之琳自縛請先季死賊矜而放遣後辟為司徒府薦士而退



王嘉

平陵人初以明經射策甲科為郎坐事免鴻嘉中舉敦朴直言召對政事得失累遷至御史大

夫前後屢上封事哀帝時拜相封新甫侯

王丹

下邳人哀平時仕州郡王莽時連徵不至家累千金隱居養志施周急每歲農時常載酒穀詣

田間以勞勤者而誨勵其惰者十餘年間其化大洽風俗以篤邑致殷富

王闕

魏郡元城人王莽叔父平阿侯譚之子也哀帝時為中常侍時倖臣董賢為大司馬寵愛貴盛

闕屢諫忤旨哀帝臨崩以璽綬付賢曰無妄以與人時國無嗣主內外惶懼闕白元后請奪之

賢素憚闕剛直不敢拒乃跪授璽綬闕馳上太后朝廷壯之及王莽篡位忌闕乃出為東都太

守懼誅常繫藥手內莽敗漢兵起闕獨完且全沽東都三十餘萬戶歸降更始

王仲

瑯琊不其人隱居不仕好道術明天人時濟北王興居反哀王襄欲致之麾右以師委之仲懼禍及嘆曰不去將鉗我於市矣乃浮海奔樂浪山家焉不知所終

王良

字仲子蘭陵人王莽時隱居教授建國累官至大司徒司直在位恭儉妻子不入官署以禮

進止朝廷敬之後以病歸復徵至榮關疾篤造其友人友人拒不肯見曰不有忠言奇謀而取

大位何其往來屑屑不關之良慙

王梁

要陽人初為郡吏彭寵以梁守孤奴令為關廷將兵從光武拜偏將軍後擢大司空擊赤眉有

功入為河南尹封阜成侯

王霸

字元伯潁陽人從光武為王郎所逼將至滹沱時河水流漸衆恐難濟霸即說曰冰堅可渡遂

前至河水果合乃濟  
後以功封淮陽侯

王闕

字選公吳人以明易稱通天文之學建武初任  
為山陰令遷御史補陳留太守不交權貴公庭

閒寂人號  
王獨坐

王常

字顏卿舞陽人王莽末起兵入南郡後與光武  
合軍破王尋王邑于昆陽以功封山桑侯光武  
嘗謂羣臣曰常輔翼帝室心如鐵石真忠臣也  
遷漢忠將軍累平諸郡拜橫野大將軍位冠諸

將卒諡  
節侯

王隆

雲陽人避難河西為竇融左護軍建  
武中為新汲令所著有詩賦銘書

王况

字文伯志節高亮為陳留太守性聰敏善行德  
教明帝永平中蝗蟲起泰山彌衍兗豫過陳留

界飛遊不集  
五穀獨豐

王喬

後漢為鄴令有神術每朔旦嘗自詣朝堂帝怪其來數而不見車騎密令太史伺之將至有雙鳧從南來羅之得雙鳧焉乃所賜尚書官屬履也

王青

聊城人為東郡吏王莽居攝祖翁與太守翟義起兵西誅莽遣王邑等擊義兵敗餘衆歸翁翁守節力戰莽燔死之父隆建武初為都尉功曹青時為小吏與父從都尉行縣道遇賊隆以身衛都尉遂死青被流矢貫咽東郡太守張酺嘆曰豈有一門忠義而爵賞不及者乎遂擢右曹仍薦青三世死節宜蒙顯異

王輔

平陸人學公羊傳隱居以道自娛建初元年詔拜郎中陳災異後拜議郎以公車徵不行卒于

家

王充

字仲任上虞人師事班彪好博覽而不守章句家貧無書嘗遊洛陽書肆閱所賣書一見輒能

記億肅宗時詔公車徵病不行嘗著論衡及養性書

王符

臨涇人少好學有志操與馬融張衡崔瑗友善時人務游宦而符獨耿介隱居著書以譏當時得失不欲彰顯其名號曰潜夫論

王禹

初為濟北王太醫復就太倉公學數歲悉通之知名漢代

王龔

字伯宗高平人為青州刺史劾奏貪濁二千石數百人遷淮南太守政崇溫和好才愛士後進知名之士莫不歸心累官至太尉子暢以清實稱累官至司空

王暢

字叔茂龔之子太尉陳蕃薦暢清方公正為齊相尋拜南陽太守奮勵威猛功曹張敞諫曰化

人在德不在用刑暢深納之更崇寬政教化遂行郡中豪族奢靡相尚暢常以布衣皮褥矯其弊後徵為長樂衛尉遷司空以水災免暢名在八俊與李膺俱稱為高士

王阜

重泉令力行德政鸞集縣庭遷益州太守始興學校漸移其俗

王烈

字彥方太原人少師陳寔以孝義稱鄉里鄉里有盜牛者主得之盜請罪曰刑戮是甘乞不使

王彥方知也烈聞而謝之使遺布一端後有老父遺劍于路行道一人見而守之烈使推求乃先盜牛者凡有爭訟將質于烈而至途或望廬而還其德感人如此

王逸

宣城人元初中為校書郎順帝時為侍中著楚辭章句及賦誅書論雜文凡二十一篇又作漢

書一百二十三篇

王延壽

逸子有俊才少游魯國作靈光殿賦後蔡邕亦作此賦成及見延壽所為甚奇之遂撤翰

又因有異夢意惡之乃作夢賦以自勵後溺水死時年二十餘

王忱

新都人嘗詣經肆見一書生疾困慙而視之書生曰我腰下有金十斤願相贈死後乞藏骸骨

忱即鬻一斤營其殯葬餘悉置棺下後遇其父迎其子喪餘金皆存忱官至縣令

王祐

鄆人隱居不仕陳紀山善知人稱祐天下之高士

王方平

名遠明天文漢桓帝問災祥題宮門數百字帝令削之墨入版矣

王允

字子師太原祁人世仕州郡為冠蓋同郡郭林宗見而奇之曰王生一日千里王佐才也允少

好大節有志立功累官豫州  
刺史討破黃巾後拜司徒

王修

營陵人。事母至孝。母以社日亡。來年隣里聚社。修念母哀甚。隣里為之罷社。孔融召修為主簿。

守高密。令復以膠東多盜。移令膠東。融  
有急難。賴修以免。曹操徙修為奉常。

三王粲

字仲宣。龔子暢之孫。博物多識。問無不知。蔡邕  
奇其才畧。聞粲在門。則倒屣迎之。後仕魏。累官

至侍中所  
著有詩賦

王朗

字景興。東海人。漢末遭亂。雖流移窮困。朝不謀  
夕。而收恤親舊。行義甚著。曹操表徵之。歷事文

明二主。屢上書。勸育民省刑。諫射獵興  
造官。至御史大夫。司空。封樂平鄉侯。

王肅

朗子。仕魏官。至崇文觀祭酒。景初。問宮室盛興  
上疏。極諫。出為廣平太守。徵還。遣散騎常侍光



祿勳卒諡景侯所著有諸經傳註  
子恂立朝中正歷官河南尹侍中

王觀

字偉臺東郡人魏文帝時為尚書郎廷尉監出  
為南陽涿郡太守所在稱治觀治身清素帥下

以儉俸屬成風莫不自勵明帝召為治書侍御  
史典行臺獄時多有倉卒喜怒而觀不阿意順

旨後遷司空固辭上送印  
綬即與歸里舍卒諡肅侯

王連

南陽人仕蜀漢為蜀郡太守建興初拜屯騎校  
領丞相長史時諸葛亮將征南方連諫以不毛

之地不宜以一國之望冒險而  
行故停留久之後封平陽亭侯

王伉

蜀漢永昌郡丞時雍閬叛伉與呂凱率吏民閉  
境拒闖十餘年諸葛亮表封亭侯陞永昌太守

王基

字伯輿曲城人少孤為叔父公孫撫育魏為中  
書侍郎時盛修宮室百姓勞瘁基上疏切諫嘗

從征毋邱儉晝策平賊遷鎮南將軍後封東武侯史稱其學行堅白垂稱著績可謂國之良臣

王平 宕渠人蜀漢諸葛亮征隴西平以牙門屬馬謖謖違亮指大敗于街亭惟平所領不敗累遷漢中太守封安漢侯子訓嗣爵平同郡漢昌句扶忠勇寬厚數有戰功功名爵位亞于平官至左將軍封

宕渠侯

王蕃 廬江人博覽多聞仕吳為常侍後為嬖臣譖死時論寃之

王昶 晉陽人世父柔北中郎將父澤代郡太守昶仕魏累官兖州刺史遷司空賜爵關內侯著兵書及治論二十餘篇

王談 烏程人年十歲父為隣人竇度所殺談有復仇志密市利錘俟度卒殺度而歸罪有司太守孔

嚴義其孝勇列上宥之吳元  
興中舉孝廉不應終于家

王儀

字民表修之子志性正直不畏權勢為安東將軍司馬昭東關之敗問曰近日之事誰任其咎

儀對曰責在元帥昭怒曰  
司馬欲委罪于孤耶斬之

王哀

字偉元儀之子哀少有志操痛父非命隱居教  
授累辟不就廬墓側旦夕拜跪攀柏悲號涕淚  
著樹樹為之枯母存日畏雷母歿後每雷輒至  
墓曰哀在此讀詩至哀哀父母生我劬勞未嘗  
不三復流涕門人為廢蓼莪之篇家貧躬耕計  
口而田度身而蠶或有助遺者皆不受及司馬  
氏篡魏哀終身不西向  
而坐以示不臣于晉

王凌

字彥雲太原人魏揚豫州刺史甚得軍民歡心  
始至豫州旌先賢之後求未顯之士各有條教

意義甚美正始初為征東將軍吳大將全琮數  
萬眾攻芍陂凌率諸軍力戰爭塘瑋退走遷儀  
同三司進太尉假節鎮淮南惡司馬師不臣且  
齊王不任天位欲謀廢立事泄師將兵討之勢

窮飲藥  
而卒

王弼

字輔嗣山陽人少好老氏通辨能言時裴徽為  
吏部郎何晏為吏部尚書皆奇之乃以弼補臺

郎謁曹爽爽屏左右與論道移時弼與鍾會善  
會服其高致嘗曰聖人茂於人者神明也同於  
人者五情也神明茂故能體冲和以通無五情  
同故不能無哀樂以應物註周易及老子正始

十年以  
公事免

晉  
王雅

字茂達蕭曾孫祖隆後將軍父景大鴻臚雅舉  
秀才累遷尚書左右丞歷廷尉侍中左衛將軍

敬慎奉公朝廷大議多叅謀議遷左僕射卒贈光祿大夫子準之協之少卿皆至顯官並有士操

王祥

字休徵臨沂人性至孝事繼母極恭謹母欲生魚天寒冰凍祥將剖冰求之冰解得雙鯉嘗為

徐州別駕率兵討寇州郡清淨政化大行晉初拜太保進公爵

王覽

字玄通祥異母弟朱遇祥凶虐覽年數歲見祥遇楚撻輒涕泣抱持其母少止覽孝友恭恪名

亞于祥後仕至大中大夫

王隱

陳郡人父銓少好學有著述之志每私錄晉事及功臣行狀未就而卒隱博學多聞不交勢援

元帝時為著作郎令撰國史

王渾

字去冲晉陽人累官至司徒弟湛幼有識度簡言語父喪居墓次服闋闔門守靜不交當世仕

至汝南內  
史子濟

王湛

字處冲少言語宗族以為癡渾子濟詣之見牀頭周易湛因剖析玄微濟嘆服晉武帝每見濟

曰卿見癡叔死未對曰臣叔不  
癡為汝南內史時稱王汝南

王濟

字武子風流豪爽氣蓋一時性好馬時洛陽地貴買地為馬埒編錢滿之時謂之金溝

王稜

臨沂人國子祭酒琛之子少歷清顯累官丞相從事中郎從兄導以稜有政事宜守大郡乃出

為豫章太守加廣武將軍稜知從兄敦驕傲自負有罔上心日夕諫諍以為宜自抑損每言苦

切敦不能容  
潛使人害之

王戎

字濬仲覽姪父渾涼州刺史戎幼頴悟與阮籍為竹林之遊後襲父爵以平吳功進安豐縣侯

累遷尚

書令

王衍

字夷甫戎從弟戎嘗曰衍神姿高傲如瑤林瓊樹自然風塵物表為元城令終日清談而縣務

亦理累遷至司徒後為石勒所害

弟澄少歷顯位仕終軍諮祭酒

王導

字茂弘覽孫元帝為琅琊王與導素相親善及鎮下邳以為安東司馬軍謀密策知無不為後

東遷累官至太傅封始興公兄敦反以大義滅

之出入將相戮力王室晉之中興導功為多

王舒

字處明導從弟官至揚州刺史以軍功封彭澤侯從弟廙仕至輔國將軍散騎常侍

王廙

字世將導從弟元帝時守廬江郡廙能屬文工詩畫善音樂射御博奕諸雜伎藝罔不通曉後

以功累增封邑除冠軍將軍青州刺史

王彬

字世儒導從弟少稱雅正與兄廩俱渡江累官典軍將軍豫討華軼功封都亭侯歷侍中從兄敦舉兵入石頭愍帝使彬勞之彬數敦罪惡辭極慷慨敦大怒時導在坐勸彬起謝彬曰有脚疾見天子尚欲不拜此復何謝敦曰脚痛孰若頸痛彬意氣自若後敦議舉兵向京師彬諫甚苦敦平徵拜光祿勳歷右僕射卒諡肅

王懿

字仲德太原人晉安帝北伐進懿征虜將軍加冀州刺史督前鋒諸軍事宋武欲遷都洛陽衆議咸以為宜懿曰非常之事人所駭今暴師經載士有歸心故當以建鄴為王基遷都宜候文軌大同帝深納之



王悅

字長豫，導長子。弱冠有高名，事親色養，導甚愛之。導嘗共悅奕棋，導笑曰：「相與有瓜葛，那得為。」

爾耶少侍講東宮，歷中書侍郎，先導卒，諡曰貞。

王恬

字敬豫，少好武，不拘禮法，晚節更好士，多技藝。善奕棋，為中興第一。遷中書郎弟洽，最知名。

王洽

字敬和，導第三子。導諸子中最知名，弱冠為散騎中書郎，歷吳郡內史，徵拜領軍，尋加中書令。

因讓表疏，十上穆帝詔，催洽令拜，苦讓遂不受。

王劭

字敬倫，導第五子。美姿容，有風操，雖家人近習未嘗見其有墮替之容。初為東陽太守，歷尚書。

僕射，領中軍，出為建威將軍，吳國內史，卒，諡曰簡。

王薈

字敬文，導季子。除吏部郎，歷吳國內史。時歲饑，人多餓死，薈以私米作粥濟活，甚衆。徙尚書，頃

之桓冲表薦為江州刺史固辭不拜轉督  
浙江東五郡加散騎常侍卒贈衛將軍

王彪之

字叔武彬次子穆帝時官至尚書左丞時桓  
温下武昌人情震懼彪之令簡文帝與手書

示以款誠温果奉旨不進以彪之為鎮軍將軍  
會稽內史居郡八年豪右斂迹後桓温將廢海

西公彪之令取霍光傳禮度制儀定於須臾神  
采毅然温又廢武陵王遵彪之曰武陵未有顯

罪不可以猜嫌之間便相廢徙及簡文帝崩太  
后欲令温居攝彪之曰此異常大事也未敢奉

命事遂不行時謝安桓冲欲皇太后臨朝彪之  
謂非翼戴讚揚立德之義安竟不從尋遷尚書

令卒贈光祿諡曰簡子越之  
撫軍叅軍臨之東陽太守

王允之

字深猷舒子先從伯敦嘗夜飲允之辭醉先  
臥敦與錢鳳謀逆允之悉聞其言慮敦或疑

已便于臥處大吐時父舒始拜廷允之求還定省至都以敦議白舒即與導俱啓明帝後以討賊功封番禺縣侯卒諡曰忠

王羲之

字逸少導從子以骨鯁稱善書為古今之冠論者稱其筆勢飄若游雲矯若驚龍仕至右

軍將軍會稽內史子凝之徽之獻之遂居會稽並有盛名

王沈

字處道晉陽人父機魏太守沈少孤養于從叔昶事昶如父奉祖寡嫂以孝義稱好書善屬文

以佐命勲累遷尚書令散騎常侍封博陵郡公

王濛

字仲祖晉陽人少不為鄉曲所齒晚節勵行有美譽子蘊仕至散騎常侍蘊二子恭有節操自

負才地恒有宰相之望與仕至寧朔將軍

王忱

字元遠弱冠知名歷仕驃騎長史嘗造其舅范甯與張玄相遇甯使與玄語玄正坐歛衽待其

所發忱竟不與言玄失望便去甯讓忱曰張玄吳中之秀何不與語忱笑曰張祖希欲相識自可見詣甯謂曰卿風流俊望真後來之秀忱曰不有此舅焉有此甥既而甯使報玄束帶造之始為賓主太元中出為荊州刺史都督荆益寧三州軍事建武將軍假節卒贈右將軍諡曰穆西河人性至孝蚤喪母繼母遇之不慈感冬母欲魚延緣汾水叩冰而哭忽有巨魚躍出取以供食于是母悟撫延如己出官至尚書左丞新準作亂以為左光祿大夫延罵不受準遂殺之

王尼

字孝孫城陽人東嬴公騰辟為車騎府舍人不就時尚書何綏奢侈過度尼謂人曰綏居亂世矜豪乃爾將死不久未幾果為東海越王所殺尼初入洛見越不拜越問其故尼曰公無宰相

之能是以不拜

王猛

字景畧晉人隱居華山懷佐世之念桓温入關猛縵袍見之而談當世之事捫虱自若旁無人

温異之後為

尚書右丞

王濬

字士治湖縣人家世二千石濬博涉墳典仕為車騎從事中郎累遷益州刺史造樓船平吳以

功遷鎮軍大將軍累加特進散騎常侍後軍將軍

王嶠

字開山太原晉陽人司徒渾之族永嘉末攜二弟避亂渡江時元帝鎮建鄴教曰王祐三息始

至名德之胄並有操行宜蒙飾叙遷太子中書舍人以疾不拜王敦請為參軍爵九原縣公敦在石頭欲禁私伐蔡洲荻嶠曰中原有菽庶人採之百姓不足君孰與足若禁人樵伐未知其可

敦不悅敦將殺周顛戴淵嶠於坐諫曰濟濟多士文王以寧安可殺諸名士以自全生敦大怒欲斬嶠賴謝鯤以免敦猶銜之出為領軍長史敦平後除中書侍郎咸和初朝議欲以嶠為丹

陽尹嶠以京尹至重不宜以疾居之求補廬陵郡乃拜嶠廬陵太守卒諡穆

王鑿

字茂高堂邑人父濬御史中丞鑿少以文筆著稱初為瑯琊國侍郎時杜弢叛鑿上疏勸征之

後拜駙馬都尉弟濤及弟子戲並有才名

王育

京兆人少孤貧為人牧羊每過小學必歛歔流涕時折蒲學書同郡許子章聞而嘉之給衣食使與其子同學遂博通經史後為武陽令為政清約遷并州督護破虜將軍

王獻之

字子敬徽之弟高邁不羈雖閒居終日容止不怠幼時學書父羲之從後掣其筆不得嘆

曰此兒後當復有大名太元中為中書令

王徽之

字子猷羲之子家于會稽性卓犖風流冠于一時嘗雪夜泛舟剡溪訪戴逵性愛竹嘗寄

居空宅中便令種竹曰何可一日無此君官至黃門侍郎

王承

湛子晉陽人清虛寡欲弱冠知名太尉王衍敬異之以比南陽樂廣自昶至承世有高名論者

以為祖不及孫孫不及父

王述

承子安貧守道嘗見王導導每發言一生贊美述正色曰人非堯舜安能每事盡善導改容謝

之累官散騎常侍尚書令子坦之弱冠負時名同謝安輔朝政累官中書令

王蘊

字叔仁濛子補吳興太守屬郡荒人饑輒開倉贍恤主簿入諫請待報蘊曰表上須報何以救

將死之命乎專輒之愆罪在太守于是大賑貸之賴蘊全者十七八焉

王矩

長沙人美姿容每出遊觀者盈路初為南平太守預討陳恢有功遷廣州刺史將赴職忽見一人持奏謁矩自云京兆杜靈之矩問之答稱天上京兆奉使召君為主簿矩意甚惡之至州月

餘卒

王恭

字孝伯為著作郎嘆曰仕不為宰相志何足騁美姿儀濯濯如春月柳

王坦之

字文度晉陽人侍中述子弱冠有重名寧康中遷中書令領丹陽尹時桓溫移晉祚坦之

與謝安盡心輔翼卒安社稷歷都督徐兗青三州軍事

王珣

字元琳導孫洽子為桓溫掾溫曰王掾當作黑頭公轉主簿後為尚書右僕射領吏部以才學



文章見說于武帝  
夢與大筆如椽

王澄

字平子有高名每聞衛玠言輒嘆息絕倒時語曰衛玠談道平子絕倒永嘉初拜荊州刺史

王珉

字季琰洽子少有才藝後代王獻之兼中書令二人素齊名時謂獻之為大令珉為小令

王愷

晉後將軍文明皇后之弟與王導王敦飲使美人行酒客飲不盡輒殺之敦固不飲美人悲懼

敦傲然不視凡三斬導讓之  
敦曰彼自殺家人何預卿事

王諒

字幼成丹陽人交州刺史時梁碩專威交土諒謀誅之不克碩遂圍諒于龍編敗之逼諒奪其

節固執不與遂斷諒左臂諒正色曰死  
且不避斷臂何有十餘日憤恚而死

王敞

撫軍長史裁之子辟丞相  
祭酒不就襲封堂邑公

王歡

字君厚樂陵人安貧樂道專精耽學不營產業  
巧食誦詩家無斗儲意怡如也其妻患之或焚

毀其書而求改嫁歡笑而謂之曰卿不聞朱買  
臣妻耶時聞者多哂之守節彌固遂為通儒

王充

博陵守將也慕容麟攻充甚力充糧竭矢盡誓  
不下城功曹張倚踰城出聚眾應麟充登城數

之曰卿秦之民也守卿之君也卿起兵應賊號  
義兵何名實之相違也古人求忠臣於孝子之

門卿母在城棄而不顧吾何有焉卿寧能忘不  
忠不孝之罪乎中國禮義之邦乃有如卿者耶

及城破被執  
充不屈而死

南王鎮惡

猛之孫從叔父曜歸晉客荆州頗讀諸子兵  
書嘗為臨豐令劉裕召與語異焉因謂諸佐

曰鎮惡王猛孫所謂將門有將以功封博陸縣  
子以龍驤將軍率水軍伐秦遂拔長安後為沈

田子  
所害

王玄謨

字彥德祁縣人仕宋為彭城太守累官至開府儀同三司遷南豫州刺史加都督

王弘

字體元臨沂人少好學以清悟知名仕宋有安社稷功封建安郡公進位太保領中書監

王曇首

弘弟仕宋為鎮西長史武帝謂文帝曰曇首輔相才也及帝即位累遷太子詹事子僧綽

位至吏部尚書僧虔雅善隸書仕南齊官至左先祿大夫

王份

字季文仕宋為始安內史袁粲以蕭道成篡弒同沈攸之討道成為道成所殺親故無敢視者

份獨往致慟由是顯名累遷大司農

王錫

字公嘏份之孫年十四除秘書郎與張伯緒齊名尋封永安侯普通初魏始連和劉善明來聘

使中書舍人朱异接之善明曰王錫張纘北閭所聞云何可見异具啓勅使宴於南苑善明徧論經史錫纘隨方酬答無所稽疑累遷吏部郎中稱疾不拜卒諡貞貞

王僉

字公會錫之弟歷太子中舍人出為建安太守山苒聚徒依險屢為民患僉率衆平之除寧遠

將軍盧循作亂轉安成內史以鎮撫之累遷太子中庶子卒諡恭

王僧達

臨沂人少好學善屬文仕宋累官至中書令子融文辭捷速有所造作援筆可待仕齊位

至中書郎

王誕

字茂世少有才藻晉孝武帝崩從叔尚書令珣為哀策出本示誕曰猶恨少序節物誕覽筆便

益之接其秋冬代變後云霜繁廣除風回高殿珣嘆美因而用之後為宋武帝太尉長史

王惠

字令明，誕從弟陳郡謝瞻才辨有風氣嘗與兄弟羣從造惠談論蜂起文史間發惠時相酬應

言清理遠瞻慙而退時荀伯子在坐退而告人曰靈運固自蕭散直上王郎有如萬頃波焉歷

尚書部

王球

字倩玉惠從父弟少與惠齊名簡貴不喜交游武帝受命為諮議參軍文帝時王弘兄弟貴重

朝廷球終日端坐未嘗相往來弘亦雅敬之歷位尚書時中書舍人徐爰有寵於上上嘗命球與之相知球辭曰士庶區別國之章也臣不敢奉詔上改容謝之卒贈光祿大夫

王景文

名或僧朗之子少與陳郡謝莊齊名太宗娶景文妹起家太子太傅襲爵建陵子景遷揚

州刺史景文嘗以盛滿為憂屢辭位不許後帝慮一旦晏駕皇太后臨朝景文歲暮不為純臣乃

遣使齋手詔并藥賜死景文與客棋叩函看已  
復置局下神色不變局竟斂子納奩畢徐曰奉  
勅賜死以勅示客客中焦度怒曰大丈夫安能  
坐受死州中文武數百足以一奮景文曰知卿  
至心若見念者為我百日計  
乃作墨啓致謝飲藥而卒

### 王悅之

字少明獻之孫少厲清操有風檢為吏部郎  
泰始中為御史中丞上以其廉介賜田五頃  
遷侍中掌檢校御府太官太醫諸署時姦竊者  
悅之案覆無所避得姦甚多於是衆署共呪詛  
之悅之病甚恒見兩烏衣人捶之及卒  
上收典掌者十許人桎梏之投之中流

### 王竣之

字宣約淮之弟好學博聞以著作郎兼尚書  
左丞叅定齊國儀禮初王儉撰古今喪服集  
記竣之難儉十一條更撰世行五卷建元間上  
表立學累官光祿大夫給事中卒子顥上其書

凡五十卷  
詔付秘閣

王鎮之

字伯重瑯琊臨沂人徵士弘之兄初為瑯琊王衛軍行參軍遷本國郎中令歸晉以為大

將軍以母老求補安成太守及桓元將卒寇亂郡境鎮之拒戰彌年子弟五人並臨陣見殺徐

道覆逼江陵加鎮之建威將軍以討道覆功封華容縣五等男

王裕之

字敬弘臨沂人與宋武帝同諱故以字行初武帝輔政召為黃門侍郎不拜宋國初建為

吏部尚書敬弘每被除召即便祇奉既到官旋復解退武帝嘉其志不苟違文帝時遷尚書令

敬弘因上表求還東上不能奪尋徵為太子少傅固辭竟不拜卒諡文貞

王准之

字元魯曾祖彪之博聞多識練悉朝儀自是家世相傳並諳江左舊事緘之青箱世謂之

王氏青箱學准之究  
識舊儀問無不對

王廣之

北齊南譙太守子珍國武帝雅相知賞謂廣之曰珍國堪大用卿可謂老蚌也帝每嘆曰

晚代將家子弟  
如珍國者少矣

王延之

字希季瑯琊人祖裕宋左光祿儀同三司父昇都官尚書延之任宋累官至吏部尚書家

產無所增益宋德既衰齊高祖輔政朝廷人懷彼此延之與僧虔中立無所去就時人為之語

曰二王持平不送不迎進號關南將軍遷右光祿大夫卒諡曰簡

王謏

字仲和東海人宋明帝時為司徒叅軍兼中書舍人有學行甚見親遇帝所行慘僻屢諫止之

後拜中書侍郎



王素

字休業臨沂人祖翹之晉光祿大夫素少有志行家貧母老為廬陵王國侍郎母死往東陽隱

居不仕宋孝武召為太子舍人大明中太宰辟為倉曹屬皆不就山中有蛇出聽之使人不厭

素乃為蛇賦以自况

王韶之

字休秦家貧好學嘗三日絕糧而執卷不輟父偉之為烏程令韶之因居縣境得父舊書

因私撰晉安帝陽秋時謂宜居史職元嘉中武帝以韶之博學有文辭補通直郎領西省事

王弘之

字方平宋武辟召不就拂衣歸耕文帝時從兄敬弘為吏部尚書解貂裘與之即著以採

藥釣于上虞之石頭或問漁師得魚賣否曰亦是不得得魚不賣

王儉

字仲寶宋武帝時襲爵豫寧縣侯孝武好文章天下悉以文采相尚莫以專經為業王儉弱年

便留意三禮尤善春秋時發言吐論造次必于  
儒教由是衣冠翕然並尚經學儒教於此大興

王僧綽

曇首之子遷尚書侍中年二十九父暕歷吏  
部尚書子承祖儉父暕三世為國師僧虔為

太子舍人沈約云自開闢以來未有  
爵位蟬聯文材相繼如王氏之盛

王秀之

字伯奮瑯琊人仕宋為太子舍人吏部尚書  
褚彥回欲與結婚秀之不肯後為晉平太守

期年求還或問其故答曰此郡沃壤珍阜日至  
人所昧者財財生則禍逐智者不昧財亦不逐  
禍吾山資已足豈可久留以妨賢路乃上  
表請代時人因以為王晉平恐富求歸

王承

尚罕以經術為業唯承獨好儒業遷居闕  
相

俄轉國

子祭酒

王僧孺

東海郟人幼聰慧穎異性極孝年七歲能讀十萬言及長善屬文工楷隸多識古事任南

齊累官中

書侍郎

王僧虔

僧綽弟為會稽太守中書舍人阮佃夫家在陳請假歸客勸僧虔以佃夫要幸宜加禮接

當拂衣去耳僧虔善書高帝嘗與賭書畢謂曰

誰為第一對曰臣書第一陛下亦第一帝笑曰卿可謂善自為謀矣

王智深

字雲才臨沂人為南齊豫章王大司馬參軍奉勅撰宋紀三十卷

王肅

字恭懿臨沂人涉獵經史頗有大志仕南齊奔魏禮遇日加除輔國大將軍屢立戰功遷揚州

刺史頓年在邊悉心撫綏遠近歸附清身好施家無餘財

王思政

祁縣人漢司徒允之後容貌魁梧有籌策仕北齊為都官尚書郎在荊州置三十城以當

衝要所薦舉咸得其才

王亮

字奉叔瑩從弟尚宋公主拜駙馬都尉齊竟陵王子良開西邸延才俊亮亦與焉位普陵太守

在職清公有美政建武末為尚書左僕射始武帝至新林內外百僚皆送誠欵亮獨不遣及東昏遇弒乃歸武帝累遷光祿大夫被劾廢為庶人因屏居閉埽不通賓客為中書監散騎常侍

子諡煬

王猛

字世雄本名勇准之玄孫博涉經史兼習孫武兵法大建初釋褐遷永陽王錄事參軍陳安邊

拓境之策詔隨吳明徹畧地以軍功遷太子右衛率徙晉陵太守威惠兼舉姦盜屏跡尋命鎮

廣州而隋師濟江總督所部赴援聞臺城不守  
乃藉藁不食及審後主不死闕辛昉赴京歸款  
文帝大悅降璽褒  
賞尋卒諡曰成

王擣

善屬文時王儉使賓客類事多者賞之何憲為  
勝賞以五花筆白團扇擣後至操筆立成文辭

華美乃命抽憲筆  
掣取扇登車而去

王慈

字伯寶僧虔子仕南齊初除秘書郎累官大司  
馬長史侍中領步兵校尉慈以朝堂諱榜非古

舊制迺上表詔從之以為冠  
軍將軍卒贈太常諡曰懿

王晏

為上虞令孔覲自會稽發兵反晏起兵攻之覲  
率千人趨石澗竄于山嶠村村人縛以送晏斬

之東  
閣外

王慧龍

太原人幼聰慧王愉以為諸州之龍故名焉齊太武時授龍驤將軍宋文遣刺客呂玄伯

為反間來屏人有所論龍疑之使人探其懷有尺刀玄伯請死龍曰各為其主也遂捨之時人

服其量

王僧祐

字僧宗儉從弟幼聰悟雅為從兄儉所重每鳴笳列騶到其門候之僧祐輒稱疾不前儉

曰此吾之所望于若人也世皆推儉之愛名德而重僧祐之不趨勢也齊武帝永明中為太子

中舍人

王虛之

字文靜石陽人年十三喪母三十三喪父三十五年鹽酢不入口疾病着牀忽有一人來

問疾謂之曰君病尋差俄而不見病果尋差庭中楊梅樹隆冬生實又每夜所見有光如燭墓

上橘樹一冬再實時  
人咸以為孝感所致

王延之

瑯琊人明帝時為吳郡太守罷郡歸家產無所增益後為吏部尚書復出為後軍將軍

王瞻

字思範猷之子起家著作佐郎遷司徒王長史出為晉陵太守時大司馬王敬則作亂經晉陵

郡民多附敬則軍敗臺軍討賊黨瞻言於朝曰  
愚人易動不足窮法明帝許之所全活者萬數

累遷吏部尚  
書卒諡康侯

王峻

字茂遠吳興太守秀之子峻起家著作佐郎遷桂陽內史梁武帝會義師起上流諸郡驚擾峻

閉門靜坐一郡帖然天監中累官太子中庶子  
出為宣城太守為政清和吏民安之後遷吏部

尚書處選甚得  
名譽卒諡曰惠

王思遠

臨沂人晏從弟為竟陵王錄事參軍累遷御史中丞沈昭畧犯賊私思遠劾奏之建武中

遷吏部郎以兄晏為尚書令固辭改授司徒左長史初明帝廢鬱林王思遠勸晏若及此引決猶可保全門戶不失後名晏謂子弟曰隆昌之末阿戎勸我自裁若從其語豈有今日思遠遽應曰如阿戎所見今猶未晚也晏累旬日而敗官至侍中

王績

字叔素景文子襲爵為始平縣五等男元徽末除東陽太守齊武帝為撫軍張岱選績為長史

呈選牒太祖謂岱曰此可謂素望累官太常卒謚靖子

王辨

字召才祁縣人學涉該博尤明左氏春秋器宇肅然雖射不穿札而有凌雲氣仕梁為江

州刺史後平侯景之亂加侍中尚書令累遷至大司馬



王茂

太原人好讀兵書性寬厚居家未嘗有情容梁武帝以王佐許之事無大小皆詢焉累官至江

州刺史在州不取俸獄無滯囚居處被服同于儒者卒贈太尉諡忠烈

王冲

字長深弘玄孫父茂璋尚梁武帝妹新安公主卒於齊梁武深鍾愛冲賜爵東安亭侯後遷南

郡太守習於法令政號平理侯景之亂求解南郡景平授丹陽尹紹泰中高祖受禪以冲前代

舊臣特申長幼之敬文帝即位益加尊重卒諡曰元簡

王瑒

字子璵冲之子沈靜有器局文帝時累遷太子中庶子冲嘗為瑒辭文帝曰所以久留瑒於承

華正欲使太子微有瑒風法耳宣帝時歷中書令吏部尚書居家篤睦每歲時饋遺徧及親故

敦誘諸弟稟其規訓卒諡曰光子弟瑜亦知名官至侍中卒諡貞子

王宏

汲郡太守撫百姓如家人耕桑樹藝室宇阡陌躬自教示曲盡事宜在官有殊績武帝賜穀千

斛下詔稱之

王瑩

字奉光琅琊臨沂人尚宋臨淮公主拜駙馬都尉歷守義興東陽吳興諸皆有惠政齊明帝改

太子詹事瑩性清慎帝深善之薨諡靖恭

王晞

字叔明昕之弟幼孝謹有器度好學不倦北齊徵署王府功曹吏晞願養母竟不受署昭帝欲

以為侍中苦辭不受謂人曰非不愛作熱官但思之爛熟耳

王琳

字子珩會稽人體貌閑雅雖無學業而強記內敏仕梁累官湘州刺史輕財愛士得將卒心討

破侯景與杜龕功俱第一後授都尉廣州刺史

王訓 字懷範十六召見文德殿應對爽徹武帝目送之曰可謂相門有相後拜侍中

王銓 字公衡學術不及弟錫而孝行齊馬時人以為銓錫可謂玉昆金友

王文殊 字令章父沒終身蔬食不衣帛服詔榜門改所居里為孝行

王知玄 丁憂哀毀而卒詔改所居青苔里謂孝家

王華 字子陵弘從祖弟父廡為王恭戰敗華在軍中與廡相失隨沙門釋曇永逃竄武帝北伐長安辟為治中後徐羨之弑少帝每切齒噴咤歎曰當見太平時否元嘉中誅羨之等華遷護軍侍

中宋世惟華與南陽劉湛不為飾讓卒諡曰宣

王琨 華之從弟宋武帝初為桓修叅軍歷廣州刺史南土沃實在任者常致巨富琨無所取孝武知

其清忠加度支尚書出為吳郡太守坐用朝舍  
錢三十六萬營餉二宮諸王及作絳襖奉獻軍  
用左遷尋加侍中琨謙恭謹慎老而不踰  
每公事朝會必夙夜早起卒贈光祿大夫

王微

字累立弘弟子父孺光祿大夫微少好學善屬  
文兼解音律醫方陰陽術數初為興王友後除

南平王諮議叅軍稱疾不就除中書侍郎義興  
太守並固辭終日端坐十餘年所著文集傳于

世卒贈  
秘書監

王元規

字正範性孝事母甚謹晨昏未嘗離左右梁  
武帝時有暴水流漂居宅元規唯有一小船

倉卒引其母妹并姑姪入船而去留其男女三  
人閣于樹杪及水退俱獲全時人稱其至行

王志

字次道僧虔子為東陽太守郡獄有重囚十餘  
人冬至日悉遣還家過節皆返惟一人失期獄

司為言志曰此事太守事主者弗憂明旦果自詣獄辭以婦孕稍遲吏民益嘆服之視事三年

郡內晏然

王彭

直瀆人父母亡家貧力弱無以營葬兄弟二人晝則傭力夜則號哭鄉里並哀之墓處去淮五

里荷擔遠汲困而不周一旦大霧忽湧泉水葬竟水便自竭詔改其里為通靈里

王勣

字公齊梁武帝時為南徐州別駕從事史長帝謁園陵道出朱方勣隨例迎候勅令從陵側所

經山川莫不顧問勣隨事應對咸有故實又從登北顧樓賦詩詞義清典帝甚嘉之

王融

字元長父道瑛廬陵內史母臨川太守謝惠連女性敦敏教融書學融少而警慧博涉有文才

從叔儉謂人曰此兒年四十名位自然及祖舉秀才晉安王南中郎版行叅軍累遷太子舍人

王詡字士遊肅從子風神秀立好學有文才位中書侍郎出為濟州刺史清靜有政績入為散騎常

侍領國子祭酒子深儀同開府記室叅軍

王誦字國章融子學涉有文才神氣清雋風流甚美歷位散騎常侍長秘書監黃門侍郎子雋康清

雅頗有文才為外府祭酒

王筠字元禮僧虔孫能文嘗為詩呈沈約約歎咏其美謂人曰此文指物程形無假題署又曰知音

者希真奇殆絕所以相要者政在此耳梁武帝時為司徒簡文帝即位為太子詹事

王泰字仲通仕梁武帝轉黃門侍郎每預朝宴刻燭賦詩文不加點帝深嘉嘆沈約常曰王有養炬

謝有覽舉養泰小字炬筠小字也

王籍

字文海任齊為餘杭令好學有才氣為詩慕謝靈運時人咸謂康樂之有王籍如仲尼之有邱

明老聃之有嚴周梁天監中為輕車湘東王諮議叅軍隨府會稽郡至若邪溪賦詩云蟬噪林

逾靜鳥鳴山更幽劉孺見之擊節不能已

王春

北齊人少精易占明陰陽風雨神武引為館客官至東徐州刺史賜爵安夷縣公

王褒

字子深既名家文學優贍當時咸共推挹故位望隆重寵遇日甚而愈自謙損不以位地矜物

時論稱之周孝閔帝踐祚封石泉縣子明帝即位加開府儀同三司武帝保定中除內史中大

夫

王軌

太原人王允之後性質直事周累官內史下大夫處以腹心之任以功進位柱國拜徐州總管

咸鎮敵境陳  
人甚憚之

王榮世

館陶人仕魏為三城戍主方城縣子梁師攻  
圍自矜力不可全乃先燒府庫後殺妻妾既

而城陷不屈被害詔進  
爵為伯贈徐州刺史

王憲

字顯則劇人猛之後仕後魏為廷尉卿出為上  
谷太守清身率人風化大行後以年老特賜錦  
繡布帛珍羞禮膳卒  
年八十九諡曰康

王昕

字元景憲曾孫少篤學仕後魏累官常侍武帝  
或時袒露與侍臣戲狎見昕即正冠歛容昕母  
崔氏學識有風訓生九子皆  
風流醞籍世號王氏九龍

王羆

字熊羆京兆霸城人剛直木彊處物平當州閭  
重之魏天和中除殿中將軍遷雍州別駕清廉



疾惡勵精公事刺史崔亮有知入之鑿見羆雅相欽挹梁將曹景宗圍荊州勅羆與別將裴衍率兵赴救遂與梁人戰大破之時諸方鼎沸所在凋殘荊州新經寇難尤藉慰撫以羆為荊州刺史進號撫軍將軍封定陽子卒贈太尉都督湘冀等十州刺史諡曰忠

王則

字元軌自云太原人也少驍果有武藝初隨叔父魏廣平內史老生征討每戰功老生為朝廷所知則頗有力初以軍功賜白水子神武天平初頻以軍功都督荊州刺史則有威武邊人畏服之卒贈司空諡烈懿

王悅

字象喜京兆藍田人也少有器幹為州里所稱文帝初定關隴悅率募鄉里從軍屢有戰功大統元年除相府刑獄叅軍封藍田縣伯及于謹伐江陵令悅從軍展效江陵平因留鎮之孝閔

帝踐祚授郢州刺史尋拜使持節驃騎大將軍  
開府儀同三司大都督司人中大夫進爵藍田  
縣侯遷司憲中大夫賜姓宇文氏悅性儉約不  
營生業雖內外禁顯家徒四壁而已明帝手勅

勞勉之保定元年卒

王紀

梁益州都督武帝時建寧越  
傳叛紀開通道路撫定夷人

王洪範

上谷人建武初為青冀二州刺史厲清節  
待軍士有恩郡人呼為父比卒言者墮淚

王珍國

字德重沛郡相人梁桂陽內史境內肅清罷  
任經江州刺史柳世隆見其還裝輕素嘆曰

此真良二千石也還為大司中兵叅軍武帝雅  
相知賞謂其父廣之曰珍國應堪大用卿所謂  
老蚌也廣之曰臣不敢辭  
帝大笑累遷會稽太守

王松年

晉陽人慧龍玄孫年少知名文宣辟為主簿遷司馬別駕孝昭崩諸舊返避形迹無敢盡

哀唯松年哭必涕泣自絕于地百官莫不感慟武成雖忿然以戀舊情切亦推重之遷侍中幹

叅定律令大政咸委焉贈尚書謚曰平子劭最知名于隋

隋

王邵

字君懋隋文帝受禪拜著作郎邵復迴互其字作詩二百八十篇奏之上以為誠賜帛千匹邵

于是採人間歌謠引圖書織緯依約符命摺撫佛經撰為皇隋靈感誌合三十卷奏之上令宣

示天下邵集諸州朝集使洗手焚香閉目讀之曲折其聲有如歌咏經涉旬朔徧而後罷上益

喜賜優給

王孝籍

平原人少好學治五經與河間劉炫友善開皇中召入秘書助王邵修國史七年邵不之

禮孝籍鬱鬱不得志吏部尚書牛弘亦知其學業而竟不得調後歸鄉里附書及毛詩

王誼

字宜君其先樂浪人也誼少慷慨附覽羣言周閔帝時為左中侍上闕位累博

遷內史大夫封陽國公及太子即位是為宣帝  
憚誼剛正出為襄州總管及高祖為丞相鄭州  
總管司馬消難舉兵反帝以誼為行軍元帥率  
四總管討之未至而消難奔陳于時北至商洛  
南拒江淮東西二千餘里巴蠻多叛共推渠帥  
蘭洛州為主洛州自號河南王以附消難北連  
尉遲迥誼分兵討之旬  
月皆平進封郢國公

王世積

新回人也世積容貌魁岸腰帶十圍風神爽  
拔有人傑之表在周以功拜上儀同封長子

縣公高祖受禪進封宜陽郡公高頴美其才能  
甚善之授蘄州總管平陳之役以舟師自蘄水

趣九江以功進位柱  
國荊州總管諡曰威

王胄

字承基父祥陳黃門侍郎胄少有逸才仕陳歷  
太子舍人初從劉方擊林邑以功授帥都督大  
業初為著作佐郎以文詞為煬帝所重與虞綽  
齊名從征遼東進朝散大夫胄性踈率不倫自  
恃其才諸葛穎譖之帝愛其才而不罪禮部尚  
書楊元感虛祿與交及元感敗胄亡匿潛還江  
左吏捕坐誅兄  
脊為秘書郎

王貞

字孝逸少聰敏七歲好學善毛詩禮記左氏傳  
周易諸史百家無不畢覽善屬文不事產業每  
以諷讀為娛隋文帝開皇初汴州刺史樊叔畧  
引為主簿後舉秀才授縣尉非其好也謝病于  
家

王伽 章武人開皇末為青州叅軍嘗送流囚季彥等七十餘人詣京師至中途悉釋其縛戒如期至

流人感悅無敢違者高祖聞而驚異之召見稱善悉赦其罪擢伽為雍令政有能名

王韶

太原人幼方雅頗好奇節在周以軍功封晉陽縣公隋初進項城郡公晉王廣鎮并州除行臺

右僕射韶性剛直王嘗穿池起三山韶自鑽而諫王謝而罷之高祖嘉嘆賜金百兩

王通

字仲淹龍門人幼篤學慨然有濟蒼生之志詣長安奏太平十二策不見用退居河汾教授倣古作經又為中說以擬論語大業初徵不至及卒門人諡曰文中子弟凝子福郊福時

萬姓統譜卷四十二

欽定四庫全書

萬姓統譜卷四十三

明凌迪知撰

下平聲

七陽

唐王方翼

并州人早孤哀毀時號孝童高帝時累官肅州刺史烽邏精明河西蝗獨不至方翼境後遷

夏州都督為耦耕法  
力省功多百姓順賴

王君愕

洺州邯鄲人有沈謀隋亂王君廓掠邯鄲君愕往說曰隋氏失御豪俊共救其亂宜撫納

遺亡而保全之觀時變待真主足下但恣殘剽  
所過夫望竊為足下羞之君廓謝從其言及高



祖入關與君廓偕來遂拜君愕大將軍  
封新興縣公從太宗征遼沒贈邢國公

王珪

字禹玉祁縣人太宗時為諫議大夫忠直敢言  
嘗令品藻當代人物珪既歷舉之末曰激濁揚

清臣于數子亦有一  
長當時以為確論

王績

字元功通之弟隋大業中舉孝悌廉潔授祕書  
正字還鄉種黍時藥釀酒自供自號東臯子武  
德初待詔門下省官給酒一斗飲至五斗不  
亂著五斗先生傳及醉鄉記貞觀中撰隋書

王雄誕

濟陰人膂力絕人杜伏威之起用其計戰多  
克以前後功授歙州總管宜春郡公伏威入

朝以兵屬雄誕雄誕愛人善撫士每破城邑無  
絲毫犯死之日江南士庶為流涕高祖嘉其節  
以其子世果襲宜春  
封太宗時謚曰忠

王少玄

聊城人隋末父死亂兵遺腹生少玄甫十歲問父所在母以告即哀泣求尸時野中白骨

覆塵或曰以子血漬而滲者父齒也少玄鏡膚越旬而獲遂葬事聞拜徐王府參軍

王沛

許昌人少勇決歷官兗海沂密節度使明立法制軍政大治以檢校工部尚書徙忠武節度使

卒子逢任為諸衛將軍討劉楨有功加右散騎常侍

王建方

貞觀中右武侯將軍討松州諸蠻敗之蠻亡山谷建方遣使諭之歸附者七十餘城又遣

使詣西洱河諭以威信其帥遂降

王緯

太原人為長安尉累官御史大夫時裴延齡希寵以諸道負錢為羨錢緯奏此皆諸州經費大

忤其意改檢校工部尚書

王宏

柳子厚龍成錄云濟南人與太宗幼日同學因問為八體書及帝即位因訪宏鄉人竟傳隱去

是亦子陵之徒歟

王恭

滑州人少篤學教授鄉閭弟子數百人貞觀初召拜太學博士講三禮別為義證甚精博文懿

文達當時大儒每講徧舉先儒義必暢恭所說

王無競

字仲列東萊人宋太守尉弘喬孫負氣豪縱擢下筆成章科累遷監察御史改殿中會朝

宰相宗楚客輩離位偶語無競揚笏曰朝禮尚恭敬公等大臣不宜慢常典楚客怒徙無競太

子舍人神龍中詆權貴出為蘇州司馬張易之等誅坐常交往貶

王勃

字子安通之孫父福時為雍州司功參軍勃六歲能文麟德初對策高第授朝散郎後以罪廢

而福時坐勃故左遷交趾令勃往省父道出洪州為閩都督作滕王閣序眾歎其天才弟勳勵

助皆第進士者才名

王質

通五世孫少孤客壽春力耕養母講學授徒無仕進意年逾四十始擢科累官諫議大夫以直諫出為虢州刺史後為河南尹終宣歙觀察使清白畏慎所至有惠愛

王峻

景城人擢明經第歷除殿中侍御史景龍未授貴州都督築羅邕罷戍卒埭江開屯田以息轉輸百姓刻石頌德累遷朔方行軍大都督討平蘭池胡封清源郡公峻氣貌偉特感慕節義有古人風卒諡曰忠烈

王志愔

聊城人擢進士第景龍中為左臺侍御史以剛鷲為治人呼為皂鵬後遷御史中丞出為

魏州刺史改揚州長史  
令行禁止境內肅然

王求禮

許州人武后時為監察御史時三月大雪蘇  
味道以為瑞率羣臣入賀求禮厲聲曰主荒

臣佞使天有瑞何感而來  
哉羣臣震恐后為罷朝

王同皎

安陽人尚中宗女桓彥範等誅二張遣同皎  
與李多祚迎中宗復位封瑯琊公後為武三

思所誣被害睿  
宗時謚曰忠

王友貞

河內人父知敬善隸書武后時授麟臺少監  
少為司經局正字母病醫言得人肉啖良已

友貞割股肉以進母病愈詔旌其門神龍中徵  
為太子中舍人固辭玄宗在東宮表以蒲車召

不至

王紹宗

江都人少貧嗜學工草隸書徐敬業起兵以幣聘之稱疾不起武后時擢祕書監紹宗雅

修飾當時公卿莫不慕悅其風

王勔

勔勔皆著名故杜易簡稱三珠樹其後助勔又以文顯勔早卒福時少子勸亦有文福時嘗

詫韓思彥戲曰武子有馬癖君有譽兒癖王家癖何多耶使助出其文思彥曰生子若是可夸也

王及善

邯鄲人父從太宗征遼戰死及善授朝散大夫襲邢國公爵武后時廬陵王之還及善密

贊其謀為人不甚文而清正自持臨事不可奪有大臣節累官文昌相同鳳閣鸞臺三品

王勔

勔之兄弟進士長壽中為鳳閣舍人壽春等五王出閣有司亡載冊文宰相失色勔召五吏執

筆分占其辭繁然裴行儉見之謂曰皆銓衡才至是語驗

王縉

太原人少好學與兄維俱以名聞舉草澤文章清麗科安祿山亂擢太原少尹佐李光弼以功

加憲部侍郎俄拜黃門侍郎同平章事領河東節度後知政事

王難得

臨沂人健於武工騎射天寶初為河源軍使吐蕃贊普子恃趨敏挑戰難得抉牙驟馬直

斬其首玄宗壯其果召授金吾將軍後以收復京師封瑯琊郡公子子顏檢校衛尉卿子用封

太原郡公

王元感

濮州人擢明經高第所撰書糾謬春秋振滯禮繩愆等凡數十百上之魏知古見其書歎

曰五經指南也徐堅等聯疏薦之遂下詔褒美以為儒宗

王義方

連水人事母謹淹究經術性謇特不肯造請  
責勢太宗時補晉王府參軍魏徵欲娶以妻

之姪辭及徵卒乃娶人問故曰初不附宰相今感  
知己故也高宗時擢侍御史後以論李義府貶

官

王丘

字仲山十一歲擢童子科他童盡專經而丘獨  
屬文及冠舉制科中第氣象清古行止修潔歷

官吏部侍郎出守懷州清嚴為下所畏  
復禮部尚書致仕天寶初卒謚曰文

王維

字摩詰太原人九歲知屬辭開元九年擢進士  
第一遷尚書左丞工草隸書畫名盛于天寶間

寧薛諸王待若師友有別墅在輞川嘗與裴迪  
遊其中賦詩為樂孤居二十年以上元初卒代宗

求其樂章其弟縉  
集數十百篇上之



王昌齡

字少伯江寧人第開元十五年進士補秘書郎又中宏辭科遷汜水尉晚節不矜細行貶

龍潭尉以世亂還鄉為刺史間丘曉所殺有集五卷

王海賓

玄宗時為太子右衛率豐安軍使開元三年吐蕃寇隴右海賓為先鋒戰武階殺其衆諸

將妬其功按兵顧望海賓戰死

王琳

字方慶以字顯武后時遷廣州都督境內清肅議者謂治廣未有如琳者號第一下詔賜瑞錦

以著瑞政

王積薪

從明皇西幸寓宿深溪之家但有婦姑止給水火纔暝闔戶積薪夜聞姑謂婦曰良宵無

以為適與子手談可乎堂內無燭婦姑各在東西室對談已而姑曰子已北矣吾止勝九杵耳

遲明請問于姥顧婦曰是子可教以常勢耳  
婦乃指示攻守之法積薪自是其藝絕倫

王毛仲

其父高麗人坐事沒為官奴杜詩稱大奴領  
內外廐善于其事唐開元末馬至四十三萬  
上謂張景順曰馬之蕃育卿之力也對曰帝之  
力也仲之令也臣何力為乃封仲為開府儀同

司三

王忠嗣

華州人海賓子年九歲入見帝與論兵帝器  
之曰爾後為良將尋歷河西隴右節度使權

朔方河南節度佩  
四將印號為名將

王遇

武進人肅宗時與弟遐為賊所執將  
釋其一兄弟爭死賊感其誼俱縱之

王翊

字宏肱晉陽人擢才兼文武累遷容管經畧使  
討定夷獠卒贈尚書僕射謚曰肅兄翊性謙柔

歷山南東道節度使代宗目為純臣卒贈戶部尚書諡忠惠

王魯復

字夢周連江人文史足用尤長于詩詞多諷刺貞元大厯間嘗獻所為詩于朝得以事邕

府魯復意氣高邁嘗謁郎中皇甫湜久未獲見移書責之曰韓文公按賢樂善孳孳不倦公師文公之文安可後文公之道自此當攜酒弔公之墓不及門矣湜大慙復書謝之

王慧翼

鄭人詞藻清逸墳籍博瞻仕為左補闕後遷通州司馬

王智興

懷州温人少驍銳累立戰功歷遷侍御史復平賊進中丞後加尚書左僕射又以戰功封

鴈門郡王進兼侍中卒贈太尉子晏平以功為散騎常侍遷朔方靈武節度使

王建

字仲初潁州人大厯十年進士大和中為陝州司馬與韓愈張籍同時而尤相友善工為樂府

歌行思遠格  
幽詩十卷

王仲舒

字弘中祁縣人貞元中賢良方正登第為左拾遺德宗欲相裴延齡仲舒與陽城交章言不可歷發蘇二州刺史穆宗重其文召為中書舍人尋除江西觀察使有興浮屠祠屋者驅出

于境

王虔休

汝州梁人有材武信義李抱真以幣招之授兵馬司累功封同昌郡王後為昭義留後號令撫循軍中大治嘗得繼天誕聖樂以獻以宮為均後中和樂本此

王栖曜

濮陽人性謹厚善騎射累立戰功官至鄜州節度使卒贈尚書左僕射子茂元河陽行營

攻討使

王仁求

安寧人為河東州刺史教民以生聚阜財之道賦役均平恩義惠濟人心咸服夷風丕變

子善寶以雲麾將軍持節河東諸軍事河東州刺史有治蹟

王季友

豐城人博極羣書貞元進士文甚高古仕為御史中丞杜甫詩丈夫正色動引經豐城客

子王季友羣書萬卷常惜誦孝經一通看  
在手豫章太守高帝孫引為賓客敬須久

王適

字里闕幽州人初見陳子昂感  
遇詩乃請交于陳有集二十卷

王鏐

字昆吾自言太原人始隸湖南團練府為裨將  
楊炎道潭與語異其才嗣曹王臯為團練使俾

鏐誘降武岡叛將王國良以功擢邵州刺史臯  
之節度江西也李希烈南侵臯與鏐兵三千使

屯潯陽而臯全軍臨九江襲斬州遂以衆濟表  
鏐江州刺史兼御史中丞充都虞侯鏐小心善

刺軍中情偽事無細大臯悉知之因推以腹心  
雖家人燕居或預焉臯攻安州使伊慎威兵圍  
之而遣鏐入城中約降使殺不從者翌日城開  
慎以賊降乃已功不下鏐鏐稱疾避之臯為荆  
南節度使欲署府少尹而上佐鄙其人乃復檄  
都虞侯從臯朝京師臯奏鏐文用雖不足而他  
可試德宗擢為鴻臚少  
卿卒贈太尉謚曰魏

王茂元

栖曜子少好學德宗時上書自薦擢試校書  
郎改太子贊善大夫呂元膺留守東都署防

禦判官淄青留邸卒謀亂元膺率兵圍之士無  
敢先者茂元取一人斬之衆乃進賊遂出奔累  
遷嶺南節度使蠻落安  
之卒贈為司徒謚曰威

王彥威

太原人舉明經甲科補太常檢討官嘗采隋  
唐典禮沿革條次類分號元和新禮上之累

遷弘文

館學士

王播

字明敬太原人舉賢良方正補益屋尉善治獄  
事累遷京兆尹穆宗立以刑部尚書拜相弟起

性孝友讀書一經目不忘元和中以殿中侍御  
使兼集賢殿學士數上疏諫畋游累擢同平章

事

王承元

承宗弟也承宗死承元表請帥于朝穆宗詔  
起居舍人柏耆宣慰授承元檢校工部尚書

義成軍節度使北鎮以兩河故事脅誘承元不  
納諸將皆悔耆且至士哭于軍承元令曰諸君

不欲我去意固善雖然格天子詔我獲罪奈何  
前李師道有詔赦死欲舉族西諸將止弗遣他

日乃共殺之今君等卒置我無與師道比乃徧  
拜諸將諸將語塞承元即出家貲盡賜之斬不

從命者十輩軍乃定於是諫議大夫鄭覃宣慰  
賜其軍錢百萬緡赦囚徒問孤獨承元去鎮左  
右囊器幣自隨承元使空褚母留八朝昆  
弟拜刺史者四人位列于朝者四十人

王博武

長社人會昌中待母至廣州涉海口風起母  
溺博武號泣赴水救之亦死節度使盧真得

屍葬之詔刻  
石表其墓

王起

字舉之釋褐校書郎遷中書令諫穆宗畋游事  
歲中考第一帝嘗以疑事令使者口質起具榜  
子附使者上凡成

十篇號曰寫宣

王徽

字昭文第進士曾祖擇從昆弟三人曰易從朋  
從言從皆擢進士第至鳳閣舍人者時人故號  
鳳閣王氏自是訖大中時登進士者  
十八人位臺省牧守者三十餘人



王晏宰

晏平弟甘露之變以功為御史大夫累擢寧慶節度使後以太子少保分司東都進少傅

王鐸

字昭範播弟炎之子炎仕至太常博士鐸會昌初進士累官同平章事從僖宗幸蜀以經濟自

任尋為田令孜所構罷為檢校司徒卒遇害

王敬武

青州人中和中盜發齊棣間遣敬武擊定因授平盧軍節度使進檢校太尉同中書門下

平章

事

王紹懿

節度使王紹鼎弟也咸通間為成德軍節度使在鎮政尚寬簡軍民便之疾革召兄子景

崇謂曰吾兄以汝幼故授我節鉞今汝已長復以歸汝努力為之忠君和隣勿墮先業言竟而薨

王凝

字成度，翊曾孫。少孤，依其舅宰相鄭肅。舉明經進士，後歷臺省。寢知名，累擢禮部侍郎。不阿權

近，為商州刺史。驛道所出，吏破屋不能給，而州有治賦羨銀，常擢直以優吏，俸凝不取。

以供過客，故無橫擾人。皆感之，徙湖南觀察使。僖宗立，召為兵部侍郎，領鹽鐵轉運使，贈吏部

尚書諡曰貞

王希羽

歙州人，詞藝優博。天復元年登第，時七十餘，先是昭宗新平內難，開放新進士詔，知貢舉

杜德祥有孤，平屈人宜以名聞，特勅授官。故德祥以希羽、曹松、劉象柯、崇鄭希顏應詔，各授校

正其制云：念爾登科之際，當予反正之年，宜降異恩，各膺寵命。松舒州人，學賈司倉，為詩此外

無他長時號松啓事為送年脚狀，象京兆人，崇希顏皆闔人，年皆相，亞號五老榜。

王駕

字大用河中人昭宗大順初進士及第仕至尚書禮部員外郎自稱守素先生與司空圖鄭谷

為詩友

詩六卷

王密

大厯中為剛州刺史有惠政密嘗為前刺史裴儼紀德碣有云余榻高蹤以密之稱裴為此其

效法前修不必政自己出

可為淺薄更張者戒矣

王潮

固始人與弟審邽審知並以才氣知名僖宗時舉兵略定閩地昭宗假潮福建觀察使乃作四

門義學還流亡定賦斂遣吏勸農人皆安之後

為威武軍節度使審邽為泉州刺史審知梁以

為閩

王

王琚

懷州人明天文象緯方補諸暨縣主簿過謝東宮太子遽召見太子喜恨相知晚帝于琚眷委

特異與大政事時號  
內宰相歷九州刺史

王師範

朱全忠圍鳳翔昭宗召方鎮赴難王師範聞之哭曰吾為國守藩君危不持可乎乃與楊

行密連盟遣將張居厚李彥威以甲槩二百與給為獻者及華州先內十與閩人覺衆環甲諫殺全忠守將婁敬思是時崔胤方在華閉門拒戰執居厚還全忠

五代王周

晉高祖天福中為貝州涇州節度使涇州張彥澤為政苛虐乃更為寬恕問民疾苦去其苛弊二十餘事民皆服歸歷遷武勝保義義武成德四鎮皆有善政

王思同

後唐愍帝時為右武衛上將軍從珂引兵東至昭應前鋒追執思同從珂責曰罪可逃乎

思同曰非不知從王而得生恐終死不能見先帝于地下從珂媿其言乃殺之

王彥章

字子明鄆州壽張人為行營先鋒馬軍使驍勇絕倫每戰用二鐵鎗皆重百斤一置鞍中

一在手所向無前時人謂之王鐵鎗及敗于中都為唐將魯可素所擒彥章武人不知書嘗為俚語謂人曰豹死留皮人死留名其忠義蓋天性也唐莊宗多方諭之不屈遂見殺

王

闕

徐州滕人少壯勇應募隸唐禁軍晉開運中陝州契丹南侵歸漢為絳州防禦使周封闕國公宋封韓國公以太子太師致仕

王顏

南唐人以討東甌功擢高安令從加遊奕闕伐馬闕四十城得兵八九萬先是唐改靖為闕

未幾改筠已而廢至是李璟特復筠州以寵顏投金紫光祿大夫檢校司徒持節筠州諸軍事守刺史兼御史大夫上柱國大原縣開國男食邑三百戶保大十年六月到任時闕入境顏

率義武八千餘備禦闕  
以環城市民賴以安

王朴

字文伯東平人少舉進士為校書郎周世宗即位遷比部郎中獻平邊策遷左諫議大夫知開封府事轉端明殿學士時世宗欲平一天下朴言用兵之策先江南而後河東世宗見其議論偉然益以為奇引與計議天下事無不合遷樞密副使顯德中詔朴定欽天律考正雅樂及卒世宗臨其喪慟之贈侍中

王殷

大名人事母以孝聞晉時以戰功累為奉國右廂都指揮使後從漢高祖討杜重威先登力戰矢中其腦鏃自口出而不死高祖嘉之以為侍衛步軍都指揮使出帝時以左右讒欲誅之遂附郭威破漢威以為鄴都留守尋以恃功驕恣被誅

王忠順

晉江人初闢王延義為朱文進所殺忠順與留從劾董思安等謀誅文進所署刺使黃紹

頗奉建州黃延政為主後南唐攻建州忠順復與思安領兵赴難戰數不利城陷忠順力戰死之

王景仁

合肥人從楊行密起淮南驍勇剛悍臨敵常以身先之後任梁為寧國軍節度使加同中

書門下  
平章事

王安

廬江人初事楊行密為親兵行密嘗升高望敵安捧危器侍側忽陣旁有執槊者疾趣行密安

置危于地取弓射之一發而殪徐納弓發中捧器如初行密奇之因加獎拔累遷棗州刺使歷典數郡皆以沈默寬厚為理南唐初為神武統軍

王仁鎬

岡人仕周累官至樞密副使後為安國軍節度郡有盜鎬遺以束帛諭之盜悉遁去宋初

加檢校太師

王易簡

萬年人唐末避地山谷間梁初既舉進士復隱華山後唐時召為右拾遺以上書忤旨出

為邠州推官周顯德中以太子少保致仕宋初加少傅卒子景讓舉進士官至尚書郎

王處訥

洛陽人少時有老叟煮石如麩令食之且曰汝性聰慧後當為師處訥留意星厯占候之

學避地太原漢時累官尚書博士判司天監事周祖入汴嘗問以劉氏祚短事處訥曰漢祚猶永第以高祖多報讐殺人所以運祚不長周祖蹶然太息後拜司天監

王承華

雅州人前蜀魏王宗侃之子母崔氏夢周公神牽五色獸逼其衣遂生承華後有異僧



見承華撫之曰老僧所居周公山佳氣減半乃  
朶零此子耶後節制洋州入洛為行軍司馬

王環

孟蜀鳳州節度使周世宗攻之為環所敗世宗  
決意攻之及秦成階三州已降環獨堅守世宗

以書招之環不答至力屈乃就  
擒世宗謂環忠其所事嘉嘆之

王景

掖縣人少儻善騎射仕唐及晉累破契丹官  
至同平章事周祖即位加侍中景起身行伍素  
無智畧臨政不尚刻削民有訟必面詰非大節  
即論而釋去民使之封褒國公世宗時有功徙

鎮秦州宋景隆初來朝加太保卒  
追封岐王然性謙退能折節下士

王仁裕

漢陽人唐廢帝時召令隨駕一時詔書皆出  
其手漢初充翰林承旨兼知貢舉為兵部尚

書周初遷太子少保所著有紫  
泥集西江集入洛集共百卷

王白

冀州人。明天文，善卜筮。仕晉為司天少監。遼太宗入汴，得之。凡決禍福，無不中。保寧中，歷彰武

與國二軍節度使，撰百中歌行於世。

王延嗣

光州人。唐亡，梁太祖拜王審知中書令，封閩王。延嗣力諫曰：「義不帝秦，此其時也。」時強藩

巨鎮僭號，審知有效，憚之意。延嗣極諫，審知雖不樂其言，然終其身不失臣節。延嗣之力也。

王宗壽

好學工琴奕，喜道術。王衍立，宗壽為太子太保，奉朝請以煉丹養氣自娛。後為武信軍節


度使，唐師伐蜀，所在迎降。獨宗壽不降，行死。出詣京師，上書求行宗族葬之。明宗嘉其忠，以為

保義將軍，行軍司馬。

王居巖

當塗人為驍衛長史，遭亂棄官歸居青山。楊行密據淮南，以兵迫起之。居巖散遣其家人

而以身歸行密授湖州別駕一日行密大會  
夫居巖急使人掩其家無一人在者後有人于嵩  
山見空石室詢其旁或云有道  
人王居巖居此去而莫知所終



萬姓統譜卷四十三

欽定四庫全書

子部

萬姓統譜卷四十四至  
六

詳校官中書臣徐志晉

主事臣祁韻士覆勘

總校官知縣臣楊懋珩

校對官中書臣高中

謄錄監生臣王宮

欽定四庫全書

萬姓統譜卷四十四

明 凌迪知 撰

下平聲

七陽

宋

王彥超

臨清人性溫和平恭謹能禮下士五代時歷仕晉漢周累官河陽三城節度使以功加檢校

太師領數鎮皆有功宋初

加中書令後封邠國公

王祐

莘縣人祖言唐黎陽令父徹後唐進士官至左拾遺祐性倜儻有俊氣仕為殿中侍御史累官

兵部侍郎卒長子懿舉進士嘗知袁州有政績

王昭素

酸棗人篤學有志行為鄉里所稱聚徒教授嘗著易論二十三篇太祖召至賜坐令講易

因訪以民間事深見嘉獎拜國子博士致仕

王溥

字齊物祁縣人父祚周宿州防禦使溥漢時舉進士第一仕周為中書侍郎平章事宋初位司空太宗時晉祁國公卒謚文獻溥藏書萬卷長子貽孫徧覽之累官右司郎中幼子貽永慶厯

中拜相

王全斌

太原人初仕周右廂都指揮使宋初為西川兵馬都部署平蜀有功全斌輕財重士寬厚

容眾軍旅樂為之用初入蜀時太祖嘗因大雪解所衣紫貂裘帽遣使馳賜焉

王明

字如晦成安人仕周歷清平郟城二縣令宋初知榮州以清正持身而德惠及民太宗召拜諫

議大夫累官禮部侍郎知真定府子挺扶並進士及第皆知名

王顯

開封人少給事晉邸即位補右班殿直未幾數加進擢太平興國八年除宣徽南院使兼樞密

副使淳化二年罷為節度使咸平二年樞密使三年罷復建節卒年七十六贈中書令子希逸

太常博士直史館希範並遷官

王延德

東明人曾祖芝濮陽令祖璋相州錄參父溫石晉末契丹內寇率鄉豪捍蔽里人德之延

德素謹慎事太宗真宗累官至東京舊城都巡檢使所著好撰集近事掌御厨有司膳錄掌皇城有紀事錄從郊祀則有南郊錄及治郡則有奏報錄

王嗣宗

字希阮汾州人曾祖同節實鼎令祖待價汾州防禦推官父夢證成州判官嗣宗開寶末

進士第一累官樞密副使卒謚景莊嗣宗能睦宗族著遺訓戒子孫勿得析居所著有中陵子

三十卷

王仁瞻

字子豐方城人性倜儻任為武德使知秦州累遷宣徽北院使判三司後從太宗征太原

加檢校太傅

王延範

江陵人形貌奇偉喜任俠家富于財父保義為高氏武泰軍留後高從誨奏署延範太子

舍人太平興國中為廣南轉運使

王克貞

廬陵人南唐進士累官光政院副使宋初授太子中允知漢州太宗聞其有文詞命直舍

人院誥命典正時人推之修太平廣記總類出知滑襄梓三州所至皆有善政



王著 字成象成都人父負仕王建為雅州刺史父景  
璩為萬州別駕著在蜀以明經及第入宋授隆

平主簿累官  
至殿中侍御

王繼英

開封人少為筆吏趙普罷相常從者去繼英  
奉事愈謹普復相以補中書省官真宗在襄

邸為前導即位擢引進使未幾除宣徽南院使  
景德二年樞密使三年堯年六十一贈侍郎謚

恭  
懿

王繼勳

陝州平陸人初仕周歷憲麟等州刺史宋初  
授道州刺史上南漢可圖狀王師南伐以為

賀州道行營都監繼勳有武勇在軍陣  
常用鐵鞭鐵槊槌軍中目為三鐵王

王貴

太原人累官都指揮使太宗時從潘美北征頗  
立戰功及從楊業為遼兵所圍親射殺數十人

矢盡張空拳又擊殺數人  
遂遇害時年已七十三矣

王化基

字永圖真定人仕為左拾遺擢諫議大夫御  
史中丞太宗問邊事對曰治天下猶植木根

本固則枝幹不足慮朝廷治則邊鄙何患不安  
官至叅知政事卒謚正獻子學正累官叅政

王榮

定州人少有膂力事太宗於晉邸累官侍衛馬  
軍都虞候出為定州行營都部署真宗時以功

遷至右衛大將軍領昌州防禦使榮善騎射  
引強注屋棟矢入木數寸時人目為硬弓

王濟

字巨川饒陽人父恕後唐時童子及第開寶中  
知秀州會盜起城陷為盜所殺將并害濟濟伏

柩號慟謂賊曰吾父已死吾安用生為但恨力  
不能殺汝以報讐耳賊義之捨去濟攜父骨匿

山谷間既而官軍大集濟脫身謁其帥朱乙陳  
討賊之計乙嘉之遺以束帛奏假驛置遣歸景

德四年拜本曹郎中出知杭州

王沔

字楚望齊州人太平興國二年登進士第八年簽書樞密院雍熙三年改副使端拱元年參知

政事淳化元年罷卒贈工部尚書沔辨慧苛刻尚數多詐視士大夫猶視吏卒唯以甘言悅人而進退皆非物望初與張齊賢同在樞府不協及齊賢同參知政事頗不自安因王禹偁請中書本廳不得接見賓客許于政事堂同見沔喜即奏行謝泌疏駁而止上知沔意因切責罷之沔冒貨雖親舊未嘗毫末相及唯聲音清暢上親試舉人多命近臣讀之所讀常得八九

王彥昇

本蜀人唐同光中移家洛陽補東班承旨歷晉周官至龍捷軍都虞候宋初累官原州防

禦使西人畏之不敢犯塞太祖以其專殺韓通終身不授節鉞改原州防禦使羌人有犯法者

割其耳而任之戎人畏服一方安靜

王漢忠

彭城人少豪蕩有膂力太宗時為殿前指揮使累遷侍衛馬軍都指揮使契丹掠中山往

禦之追殺甚衆漢忠有識畧輕財樂施崇儒好文名稱甚茂卒贈太尉

王信

字誠之太原人少勇悍真宗時應募以擒賊功補龍神衛指揮使累功遷保州刺史王則反為

見州城下都總管城破則遁信率兵執則而還拜感德軍節度觀察留後

王禹偁

字元之鉅野人九歲能文太宗朝舉進士為右拾遺嘗獻端拱箴及禦戎十策文章獨步

當時累遷翰林學士所著文集有五十餘卷子嘉祐第進士官至殿中侍御史曾孫份進士甲

科官至戶部侍郎

王彬

固始人淳化中進士為雍丘尉通判筠州推恩  
行利剗煩去蠹後歷陝西轉運使遷知太常少  
卿

王欽若

字定國新喻人淳化間舉進士累官至尚書  
左僕射兼中書侍郎同平章事進司空封冀

國公卒贈太師  
中書令諡文穆

王世則

永福人舉進士第一淳化初以右正言使交  
州還朝條事迹及山川形勢上之進直史館

未幾以言儲貳  
事黜知象州

王能

定陶人太宗在晉邸召置左右即位補內殿直  
累遷殿前右班都虞侯出為濟州團練使建議

決鮑河斷長城口北注雄州塘外為戎馬限方  
舟通漕以實塞下又開方田盡靜戎順安之境

北邊來寇能擊走之真宗初詢勤勇者聞能宣力公家擢定州副都部署後為章信軍節度卒

贈太尉錄其子守信

王贊

觀城人少為小吏累遷本州馬步軍都虞候周世宗鎮澶淵每旬決囚贊引律令辨析中理令

署右職及即位累官三司副使征關南以為客省使領河北諸州計度使五代以來姑息藩鎮有司不敢繩以法贊所至發奸擿伏振舉綱維師還復為三司副使建隆初始平李重進太祖素知贊材幹可委以完緝即令知揚州後溺死

王承衍

字希仁雍熙中知天雄軍會契丹入寇候騎至冀州去魏二百里隣境戒嚴城中震恐時

屬上元承衍策契丹不至下令張燈設樂與賓佐宴遊及旦眾賴以安明年召還端拱再知天

雄軍吏民千餘詣監軍請  
為本道節帥詔褒美之

王言徹

字子明晉江人端拱進士知南縣縣人曾致  
堯為條治績數十事擢知邵州後歷漳鄂滁

等州皆有善政鄂滁人並生祠之時有事泰山  
汾陰郡守例以子弟奉表得推恩授官言徹獨  
遣僚屬以行曰吾子孫但衣白袍入舉子場足  
矣所著有瑯琊集子千仞公佐孫景純皆特奏  
名

王拱辰

開封咸平人年十九舉進士第一通判懷州  
累遷翰林學士承旨拜三司使使契丹還為

宣徽南院使出鎮  
北京又鎮彰德

王賓

許州人太宗時為河北水陸路轉運鹽使貝州  
兵屯無壁壘分寓邸肆賓選隙地築舍千二百

餘以處之  
優詔褒美

王旦

字子明祐次子幼沈默好學舉進士真宗嘗曰  
為朕致太平者必斯人也累進工部尚書同平  
章事當國最久帝益信之至于契丹借幣西夏  
假糧處之有道夷人愧服偉哉宰相才也卒贈

魏國公  
謚文正

王旭

祐季子嚴以治囚恕以接物以蔭知緹氏雍丘  
縣三遷至殿中丞自兄旦居宰府以嫌不任職  
及旦卒徵歷中外卓有政績後以兵部郎中知  
應天府子質舉進士歷官天章閣待制知陝州

王繼忠

開封人父為軍校戍邊而死繼忠因得補殿  
直侍真宗在東宮得給事左右即位累擢至  
雲中觀察使咸平末契丹入寇繼忠帥定武出  
戰于望都之北自以被遇之厚思力戰圖報而



服飾稍異戎人識之轉鬪累日援兵不至遂陷敵中初謂已死贈大同軍節度使錄其子懷敏懷德懷政皆加等景德初敵俾繼忠奉章道意請修和好朝廷允其請戢兵息民與有力焉自是朝廷每遣使至契丹必厚賜繼忠對使臣必泣下嘗附表請召還上以誓好既定姑詔諭之北主待之益厚改其姓曰耶律名曰顯忠又曰宗信封為吳王

王子興

字希孟密州莒人少業文辭太平興國初舉進士為北海主簿歷太常博士真宗即位遷

殿中侍御史充淮南轉運使精于吏事久掌茶鹽漕運周知利害裁量經制公私便之後拜右諫議大夫

王博文

字仲明濟陰人年十六善屬文舉進士為安豐簿有能名真宗時累官同知樞密院事子

疇舉進士為太常博士仁宗獵近郊疇引十事以諫英宗時拜樞密副使性介持厲風操類其

云父

王浴

字聖源館陶人舉進士歷知數州累官龍圖閣直學士好建明當世事初與河北水利論者以

為無益已而邢州有爭渠水至殺人者然後人知浴所建為利有文集二十卷唐志二十一卷

王鼎

字鼎臣浴子第進士累官河北轉運鹽使當官明敏彊直不可撓所薦士多知名性廉不欺嘗

任其子或勸增年以圖速仕不從父財恚分與諸弟奉使高麗得千緡盡散之族人

王曾

字孝先益都人自少穎悟善為文辭咸平中鄉貢吏部選對皆第一累官右僕射平章事集賢

殿大學士封沂國公謚文正曾資質端厚在朝進止皆有常處當國時正色危言進退士人莫

有知者嘗曰夫執政者恩欲歸已怨欲誰歸范仲淹服其言

王皞

字子融曾之弟舉進士累官集賢院學士以兵部侍郎卒嘗論次典禮因革為禮閣新編又集

五代事為唐餘錄六十卷

王珪

開封人少拳勇善騎射通陰陽術數能用鐵鞭鐵杵仕為涇原路都監元昊入寇珪從任福連戰三日諸將皆敗珪復入戰殺數百人鞭鐵撓曲手掌盡裂奮擊自若夫中目乃還夜中卒子

光祖明于料敵累官涇原等路副總管嘗從熊本平瀘夷功第一

王洙

宋城人舉進士累官翰林院學士汎覽博記至圖緯算數音律詁訓篆隸之學無所不通著易傳十卷雜文十餘篇子欽臣清亮有志操賜進士及第累官集賢院待制知成德軍欽平生為

文至多藏書萬卷俱手自讐正

王審琦

字仲寶其先遼西人徙家洛陽五代周仕為鐵騎都校宋初擢為殿前都指揮使後加同

平章事及卒追封瑯琊郡王子承衍承德承祐承僕承僅俱至顯官

王

開

河南人登進士又中賢良方正科累官資政殿學士知陝州嘗與修冊府元龜累同平章事方嚴簡重有大臣體卒贈中書令謚文康有集四十卷

王疇

字景彛博文子以父蔭補將作監主簿遷翰林學士仁宗獵近郊疇引十事以諫皇祐中召試直祕閣為開封府推官英宗疾皇太后聽政帝疾疇疏請御朝時召近臣議仁宗配祭疇議奉仁宗配享明堂從之官至樞密副使卒謚忠簡

王希呂

字仲行宿州人宋高宗南渡時寓居嘉興舉進士為正言上章劾佞臣張說出知廬州累

官吏部尚書希呂天性剛勁居官廉潔及致政歸無屋可居

王隨

字子正河南人天聖初自潤州徙知江寧府隨外若方嚴以寬為治練習民事皆能用其所長

歲大饑時轉運使移府發常平倉米計口日給隨不聽曰民饑由兼并閑糴以邀高價耳乃大出官粟私價遂平處士侯遺于茅山營書院教授生徒積十餘年自營糧食隨奏欲于茅山莊田內量給三頃充用從之在郡二年後官至同中書門下平章事

王凱

全斌曾孫徙家京兆寇準奏為三班奉職累遷麟州都監敗趙元昊以功遷侍衛親軍副都指

揮使卒謚莊恪凱治軍有紀律善撫循士卒與敵遇未嘗挫衄孫詵能書善畫尚公主

王中立

奇嵐州人博學強記家豪于財待賓客豐腆而自奉甚儉不再娶亦不就舉居一室如神

僧數年乃出人覺其談吐詩翰異常問之不言晚年易名雲鶴自號擬相臨終預尅期而逝

王駿

字總之臨城人狀貌奇偉舉進士累官鹽鐵都使時馬季良恃章獻后姻家欲置樞務駿曰與

民競利非國體也力爭罷之出知益州後召拜同知樞密院事卒謚忠穆

王德用

字元輔趙州人父超累官節度使追封魯國公德用累功遷集慶軍節度使善撫士卒名

聞四夷狀貌雄毅面黑時號黑王相公封冀國公卒謚武恭子咸融官至眉州防禦使

王存

丹陽人慶厯中進士自嘉興簿累官尚書左丞以端明殿學士知蔡州時朋黨之論漸盛存入

對首言人臣朋黨誠不可長然不察則溢及善人後以右正議大夫致仕

王舉正

字伯中化基子遺恩補授校書郎大中祥符八年登進士第仁宗即位累擢知制誥又為

翰林學士康定三年叅知政事御史臺舉其友壻李徽之為御史舉正以親嫌格不行徽之訟舉正內不制其悍妻不可以謀國事慶厯三年罷為資政殿學士知許州皇祐元年除御史中丞遷觀文殿學士禮部尚書兼翰林侍讀學士在經筵二年以太子太傅致仕卒年七十贈太子太保謚文簡有文集二十卷中書制書十卷

王伯起

海陵人父綸仕為太常博士伯起舉進士不第嘆曰士不自重而獻藝求售可恥也于是

閉門肆志于學人莫窺其面仁宗俱賜粟帛王覲誌其墓謂伯起不有其道而道著于朋友不居其名而名聞于朝廷

王堯臣

字伯行應天府人天聖五年登進士第累擢知制誥翰林學士權三司使兼端明殿大學

士加承旨羣牧使皇祐三年樞密副使嘉祐元年參知政事上欲除樞密使為當制學士胡宿

所抑止進吏部侍郎堯于位年五十六贈左僕射謚文安堯臣典內外制十餘年文辭溫潤得

王言體有文集五十卷垂絕遺奏勸上蚤擇宗室之賢者為皇嗣云

王正倫

皇祐中以太尉將兵擊僕賊戰死于難子景仁即其地結草堂祠之朝廷嘉其節賜節度

使謚曰忠獻

王景山

永嘉人少敏悟書過目成誦慶厯初進士當時伊洛諸儒未作景山獨能發明經蘊嘗作

儒志一篇學者宗之



王琪

字君玉舒州人兒童時已能詩歌舉進士調江都主簿上時務十二事仁宗嘉之性孤介數臨

東南諸州政尚簡靜每疾俗吏飾厨傳以沽名譽政待賓客頗濶畧間造飛語謗終不自恤以

禮部侍郎致仕

王逢

居巖四世孫教授蘇常學者常數百人晚始登第累官至國子直講駙馬李瑋嘗從學後為逢求遷官逢不受久之以太常博士通判徐州逢與胡援最善喜著書有易傳十卷乾德指說一

卷復書

七卷

王文貫

字貫道鄆人蚤嗜學與鄉先生余端良遊魁太學公試登慶厯進士教授真縣除宗學諭

弟宗道同領鄉薦亦舉進士文貫精毛詩以輔氏為宗從遊嘗數十人同郡知名奉化汪元春

慈谿黃震俱以論議政事  
稱于時文貫珠是顯名

王求

亦舉進士仕至榮州太守退休三十年清節大  
著

王易簡

字理得尚書佐之玄孫生而穎異幼喪父哀  
毀如成人益嗜學及冠有聲望登進士第除

温州瑞安主簿不赴隱居城南讀張子東銘作  
疏議數百言唐忠介震黃吏部虞見而器之折  
輩行與之交易簡篤倫義事伯姊甚謹尤  
調恤其族撫兄之諸孤如其子多所著述

王襄

鄞州南陽人初名寧登進士第累官權知開封  
府事縲繫滿獄襄晝夜決遣再閱月獄為之空  
後為兵部侍郎陞吏部尚書同  
知樞密院事加資政殿學士

王公輔

儋州人俗呼王六翁世傳天文蘇軾甚重之後析彥質亦與相厚一日具冠帶賀析日夜

來見天象公當內遷未幾彥質果會故移郴公輔年一百三歲而卒

王無咎

南城人嘉祐初進士累官天台令棄官從王安石遊好書力學所著學者師之後安石薦

為國子直講命未下而卒有文集行于世

王從政

宋仁宗時為東頭供奉官閣門祇候與懷智高戰于太平場被執罵賊不已至以沸湯沃

之終不屈而死贈信州刺史錄其孫二人

王贊

泰和人舉進士知開封府慶厯初知諫院言事多聽用除天章閣待制條陳時事對策甚久上

謂左右曰五方異粟若南方有燕趙之氣王贊是也英宗踐祚進給事中神宗即位改戶部侍

郎

王奇

賴縣人少為縣吏令題鴈詩于屏云隻隻銜蘆背曉霜晝隨鷺鷥立寒塘奇密續云晚來漁棹驚飛去書破遙天字一行奇之因激使學後遊京師真宗偶見其所作詩召見賜第奇作詩

云不拜春官為座主親逢天子作門生官至殿中侍御史

王鴻

雋都人博學工書試南宮不利遂歸隱嘗為米囤曰吾寧守斯廩以安吾處

王夷簡

字清叟婺源人以父武翼大夫遺澤授承信郎歷任江南第五將領積官至武翼郎夷簡

氣貌清古間居幾二十年闕風月園結還朴巷官終沅州麻陽令

王汲

通州人嘉祐中嘗作天將以夫子為木鐸賦士以為矜式因呼王木鐸後舉進士官至梓州通

判多政聲弟昌熙間舉進士任熙江縣令元豐中景靈宮成昌作賦獻之辭極雅麗又有七平

謙議三

江集

王式

曲江人唐宰相珪之裔初珪之子敬直貶嶺南子孫遂家曲江式耿介自立以孝行稱天聖初

登進士第累官大理丞歷知梅州卒子陶天聖中進士官至京東提刑度支郎中妻朱氏尤賢淑善教子五子相繼登科

王臻

字及之潁州汝陰人始就學能文辭曾致堯知壽州有詩名臻以文數十篇往見致堯覽之嘆

曰潁汝固多奇士舉進士屢遷監察御史中使就營景靈宮太極觀臻佐助工費有勞遷殿中侍御史擢淮南轉運副使累遷尚書工部郎中姦人偽為皇城司刺事卒嚇良民以取賕臻購

得其主名賂竄三十餘人都下肅然以右諫議大夫權御史中丞建言三司開封府諸曹叅軍及赤縣丞尉率用貴游子弟驕惰不習事請易以孤寒登第更仕宦書考無過者為之未幾卒

臻性剛嚴善決

事所至有風跡

王永

華陽人為右補闕吳越納土永受命往均賦至則悉除無名之算或言其多弛賦租太宗詰之對曰使新附民蒙天子仁恩臣雖得罪死不恨太宗大悅孫罕以陰累官廣東轉運使歷知潭明州為政務適人情終光祿卿子琪舉進士歷知數州政尚簡靜以禮部侍郎致仕

王獵

字得之長垣人累應進士不第乃治生積錢既而嘆曰此敗吾志也悉以頒諸親族慶厯間詔求遺逸范仲淹薦為藍田主簿府使之掌學諸生有犯法者獵自責屏之府帥意欲按治以罪

獵前曰此持年少不率教爾致于理不足以益  
美化恐適貽士類辱帥悟而喜曰吾慮初不及  
此即擇生而待獵加敬徙令林慮縣縣故依山  
俗以蒐田為生不知學獵立孔氏廟擇秀民誨  
之入為諸王侍講英宗即位拜天章閣待制方  
議濮王稱以問獵獵不可帝曰王侍讀厚亦  
持此說耶對曰臣荷皇恩厚不敢以非禮名  
號加于王所以報王也帝大悟自是不復議

王珪

永之後也祖罕教養有恩珪弱歲奇警日誦數  
千言舉進士通判揚州後為翰林學士文章闕  
麗自成一家朝廷大典冊多出其手累官尚書  
左僕射兼門下侍郎封岐國公卒贈太師謚文

恭所著有  
華陽集

王寧

字德和三魁鄉薦丙戌龍飛中乙科終中奉大  
夫直徽猷閣逮事三朝凡所敷歷綽有休聞有

笑菴集

十卷

王晦叔

河南人隋王績之後名同英宗御諱故以字稱淳化三年登進士咸平中賢良方正入等累

擢龍圖閣待制樞密直學士給事中太子賓客妻父寇準得罪落職知汝州乾興元年貶郢州

團練副使天聖四年復給事中遷工部侍郎御史中丞兼理檢使理檢置使自晦叔始也七年

叅知政事明道元年以疾免除資政殿學士知陝州徙河陽二年樞密使景祐元年加平章事

薨贈太保中書令謚文康

王夢易

榮州人累世同居號義門王氏父伯琪以義聲著聞州有鹽州籍民煎輸惟有祿家得免

伯琪請于州均之為官戶所誣賈恨以沒夢易登皇祐進士為朝奉郎欲成父志言于三司得



上聞還籍沒者三百餘家蠲歲額三十萬部刺史以他事中之罷歸

王素

字仲儀宋仁宗御筆親除四諫官素其一也帝曰王素真御史也時目為獨擊鶴出入侍從將

帥三十餘年以工部尚書致仕

王貽永

字秀長真宗以其故相家選尚太宗第四女鄭國長公主除右衛將軍駙馬都尉明年主

莞即納所賜宅累擢節度使歷宣徽使同知樞密院事改副使加同平章事以疾求罷聽免兼侍中至和初復以疾解職除右僕射校太師兼侍中鄧國公卒年七十一贈太師中書令謚康靖

王梁材

字廷衿龍溪人登元豐第上書陳朝政闕失乞減省後官及行幸不急之費上嘉納之除

京西運判遂為夔州路轉運使利州路常平使尋攝成都府事以母年高再乞就養詔從之母卒廬于墓服終起為廣南坑冶提舉特轉朝散大夫廣東轉運判官

王巖叟

字彥森清平人為監察御史上疏極陳時弊遷左司諫時李定不持所生母服巖叟論其

不孝後論章惇罪惡坐貶未幾入為起居舍人累遷至端明殿學士

王益柔

曙子兄益恭性恬澹官至司門員外郎柔少力學為文日數千言抗直尚氣喜論天下事

神宗朝累官龍圖直學士知蔡揚亳州江寧應天府司馬光為資治通鑑獨能閱之終篇其好

此學類

王惟熙

如皋人初調監城尉有羣飲而斃者囚莫肯承州以屬尉惟熙脫其械與飲食問一人曰

汝用左手而死者傷右尚何拒囚伏罪僕智高  
反嶺南諸吏棄城當死者數十惟熙奏以城不  
足恃皆  
得免

王鯨

字彥龍長溪人熙寧元豐間嘗兩舉鄉舉王安  
石退居鍾山鯨遊金陵薄其為人不肯一登其  
門而與尚書黃裳祕閣陳寬民為文字交蘇軾  
守杭州開西湖鯨投以詩有曰時闕西湖作勝  
遊使君原是濟川  
舟軾大加稱賞

王日休

字虛中舒人誨誘後學最為諄切嘗撰易解  
春秋解春秋名義養賢錄模楷書行于世自  
教小兒又手著衣祇揖入學寫字讀書治經  
閱史及作文字皆井井有條學者依賴焉

王致

字君之郵人與楊適杜醇為友俱以道義化鄉  
里諸生子弟師尊之皆稱為先生嘗與牧守言

政事王安石復書曰無事于職而愛民若此可  
以為仁矣踰七十樂道安貧妻收遺粟于拾墮  
新浩然無悶鄉人莫不高其行仁宗詔天下立  
學有文材道義者與本州校官致辭不受後召  
為祕書省校書亦不赴宰臣陳執中奏錄致文  
得一百八十篇藏之祕閣卒葬邑之棲鳳山人  
尊稱曰鄞江先生荆公志墓曰四明士  
大夫立言以垂後世者自先生始云

王說

字應求鄞人王致門人也弟該登慶厯進士第  
說隱居教授踰三十年建書院于桃源鄉熙寧

九年神宗特恩補將仕郎為州長史御書桃源  
書院四字賜之說無田以食無桑麻以衣怡然  
自得子孫世其家子珩宗正少卿孫勳廣南市  
舶一錢之利皆歸有司不識舶貨之名及卒賈  
人致錢二百萬為賻子正己却之曰吾父以廉  
直聞雖貧猶能負喪以歸不愧廉叔度也清白

之傳實先生家訓  
正己終太府卿

王恩

開封人以善射入羽林神宗偉其貌補供備庫副使累官殿前都指揮使武信軍節度使以檢校司徒致仕卒贈開府儀同三司為涇原副都總管城西安臨羌天都十餘壘後知渭州括隱

地二萬三千頃分與箭士耕屯以省餽餉

王仲寶

宋涇原路總管任福與夏人戰兵敗別將朱觀被圍于姚家堡仲寶以兵救之拔觀出圍時諸將皆沒獨仲寶與觀得還宋高密人初補尉職以捕盜功累遷涇原路總管安撫副使後

除屯衛大將軍致仕

王昭遠

宋繼昇子形質魁偉絕異有膂力善騎射為殿前都指揮使累立戰功數見勞賞卒贈太

尉謚忠和弟昭懿為捧日都虞候昭遜為西京作坊使子懷普平州刺史懷一供備庫副使懷

正內殿承制懷  
英內殿崇班

王珪

字禹玉琪從弟弱歲奇警出語驚人進士及第累官至翰林學士承旨元豐中拜左僕射封岐國公卒贈太師謚文恭珪為文閣侈瓌麗自成一家當時朝廷大典策多出其手

王汝舟

婺源人以風節自持所不合不降詞色熙寧中知舒城歲薦饑推行荒政多所全活後知南劍州治為諸郡第一

王奇

汾州人武舉中第章惇經營湖北溪峒以為將累遣湖南都監徙廣西宜州蠻寇邊奇領兵與戰裨將費萬戰沒後數日蠻大集奇戰敗麾下猶數百人勸策馬逃去奇罵曰大丈夫當盡節

以報國何走  
為戰而死之

王安石

字介甫臨川人父益歷官州縣有聲安石生有異質長博覽強記善辨不屈所為文淵源

出于典誥擢進士上第神宗  
朝拜相封荆國公卒謚曰文

王安石

字和甫石弟舉進士為著作郎因災異上疏  
言大臣有乘權射利者進翰林學士知開封

府事至立斷稱神  
明歷轉尚書左丞

王安石

禮弟自幼為文驚人數舉進士茂才賜對帝  
問卿兄秉政如何曰恨知人不明聚斂太急

耳時呂惠卿諂事安石行新法安國深惡之嘗  
諷其兄遠佞人惠卿以為恨乃因鄭俠獄陷之

放歸田里歲復除大理  
寺丞卒有文集行于世

王居卿

登州蓬萊人神宗時累官京東路轉運使青州河貫城中居卿即城上立飛梁設樓櫓下

建門以時啓閉徙河北路河決曹村居卿立軟橫二埽以道怒流水患以息朝廷賞其功建為

都水法司官至河北都轉運使

王代恕

開封咸平人為潁州司法叅軍州民樂氏為盜會赦出入閭里操弓矢為害有朱氏募客

二人謀殺之法當死公曰為法所以輔善而禁惡今殺良民為惡盜報讐豈法意耶乃狀列之朱氏得減死公有八子皆歷顯宦第七子拱辰右諫議大夫御史中丞累贈公兵部尚書員外郎

王卿月

台州人敏悟多藝能自號醒菴居士官至朝請大夫嘗權中書舍人直學士院草胡銓制



云吾寧身蹈東海獨仲連不肯帝秦名  
重泰山微相如何以強趨時論多之

王庠

夢易子七歲能屬文蚤喪父哀憤深切與弟序  
閉戶窮經期復父官未幾制科罷庠嘆曰無愧  
先訓足矣以弟序升朝贈父官後復舉八行不  
就賜號處士尋賜出身及章服俱不受卒謚賢

節序官至徽  
猷閣直學士

王介

常山人性強記負直氣舉制科累官至祕閣校  
理與王安石遊甚款然未嘗降意相下初安石  
屢召不起後受學士之命介以詩寄之有云草  
廬三顧有春螫蕙帳一空生曉寒蓋有所諷云

王君萬

秦州寧遠人以殿侍為秦鳳指揮積功擢熙  
河路鈐轄洮西羗叛圍河州君萬以計解之

累官副總管子瞻立戰功  
積官榮州防禦使知鄯州

王回

字景升侯官人父平言事擢御史回敦行孝友  
遠次必稽古人而不為小廉曲謹舉進士為衛

真縣簿稱疾自免退居潁州久之薦為忠武軍  
節度使推官知南頓縣令下而卒曾萃集其文

集弟向亦

有文名

王漢之

字彥昭常山人舉進士知真州詔諸道經畫  
財用漢之請先置都籍使能周知而校其登

耗以待用上從之尋擢禮部侍郎後連  
徙五州入為工部侍郎加龍圖直學士

王渙之

字彥舟介子常山人未冠擢高第有司疑年  
未及銓格特補武勝軍節度推官元祐中為

太學博士校對黃本祕書通判衛州入編修兩  
國魯衛信錄徽宗立以日食求言渙之對曰國

家每下求言之詔而下之報上乃或不然以指  
陳闕失為訕上以阿諛佞諂為尊君以論議趨

時為國是以可否相濟為邪說志士仁人知言之無益也不復有言而小人肆其詭譎可駭之論苟容偷合願陛下虛心公聽言無迎遜唯是之從事無今古唯是之從人無同異惟正是用則人心悅天意得矣官至實文閣直學士朝廷議北伐渙之以疾提舉明道宮卒年四十五渙之性淡泊恬於進每云乘車常以顛墜處之處舟常以覆弱處之任宦常以不過處之則無事矣其歸趣如此

### 王當

眉山人博覽古今所取惟王佐大畧嘗舉進士不中著春秋列國名臣傳五十卷元祐中蘇軾以賢良方正薦廷對慷慨不避權貴調龍游尉後見蔡京入相遂不復仕當以經學尤邃易與春秋皆為之傳得聖人之旨居多

王宿

眉山人與同郡李由頤程之才楊明家愿楊洵蘇十鈞賈勉中史彭年孫曾家度史欽家德基

家幹劉剛楊賈張縉史勵節史移中家寧史勤李畋成彪史書言費易共二十五人俱以元符

上書入

黨籍

王闢之

臨淄人登治平四年進士從仕四方志尚博雅紹聖間退居澠水日與賢士大夫遊每燕

談間有可取者輒記之久而得三百六十餘事編次成帙為十卷題曰澠水燕談行于世

王箴

眉山人蘇軾妻兄九歲通經弱冠軾見其文甚愛與成都學官侯元叔每論古人退即書數百

言如史漢論贊者元叔歎其有史筆元祐間累詔徵之力辭而免于先光俱登進士以詩文名

王綱

字振州自闕徙殺城元符進士通判徽州即解印綬歸求深林密谷居之人望其儀温然知其

為德人平生無忿意稱長者有寇自均房來綱日吾若去必殘吾鄉因具牛酒以待寇素聞其賢不忍犯郡國聞風奔其廬饑者待哺凍者索衣婚喪弗舉者助之貲里人名為無怨公子之

望叅知政事贈

綱太子少傅

王翊

麻城岐亭人建桃花菴號桃黃山人熊吉贊云桃黃之菴中有隱君尸居蔬食抱朴含真匪道

曷依匪善奚行無懷之民葛天之民

王安中

字履道曲陽人進士及第宣和中累官翰林學士尚書左丞金人來歸燕以安中為燕王

府路宣撫使以郭藥師將叛力求罷靖康初貶官安中為文豐潤敏拔有初寮集七十六卷

王覲

惟熙子舉進士為秀州司戶叅軍哲宗即位擢右司諫首陳知人安民之術徽宗立累遷御史

中丞論蔡章之惡以龍圖學士出知潤州後安置臨江軍

王俊儀

觀從子少有直節以太學上舍選奏徽宗閱其文擢為第一見容貌甚偉曰真所謂俊儀

美宜即起用蔡京欲見之拒而不往僅拜國子博士遷右司員外郎以直祕閣知岳州

王昂

江都人以文章稱于時政和中進士是年嘉王居首選徽宗以親王為嫌陞昂為第一除祕書

省校書郎高宗時除起居舍人祕書少監

王資深

山陽人第進士累官尚書郎初擢御史首論在廷大臣草具將上蔡京遣所親謂曰慎勿

言當以此位相處不答翌日出知揚州尋政明州嘗著周書及方言于洋中甲科累官直徽猷

閣歷三郡有治效所著有東牟集

王之道

無為人剛直尚氣節舉進士與兄之義之采  
同科名其堂曰三桂有桐山文集嘗夢帝命

之曰以爾有功當錄其後子十  
人仕者九人進至戶部侍郎

王公彥

字成德永嘉人與兄公輔同登紹聖第調江  
夏尉元符末上書論宣仁無負于先帝司馬

光無負于天下且言章惇迷國誤朝之罪與李  
林甫盧杞度長較短未知孰甚由是廢斥入元  
符黨籍紹興初衆  
錄轉官奉祠而終

王璧

字子潤鄆人生而穎異七歲日誦千言一過輒  
不忘宣和六年登進士第年少氣銳以遠大自

期悉焚前所為舉子文披閱羣書蘊蓄日富舉  
筆為文波瀾洶湧朝廷方復博學宏詞科首冠  
其選未幾終待次通  
判以卒士論惜之

王德

字子華通遠軍熟羊寨人欽宗末以武勇應募時號王夜叉建炎初以勤王兵從劉光世與金

人大小百戰未嘗敗北南渡後屢平劇賊積功封隴西郡侯後為荆南副都統制卒贈少傅

王庶

字子尚慶陽人崇寧中進士知涇州累立戰功擢河北經畧安撫使後與秦檜論和戰不合出

知潭州安置道州卒諡曰敏節子之奇乾道中知樞密院事

王以寧

湘潭人父長孺守靖州因言事落職以寧由太學任鼎澧帥靖康初金兵入寇羽檄召天

下兵以寧至長沙走鼎州乞師躬率入援解太原圍建元中以宣撫司叅謀制置襄鄧招諭羣

盜桑仲等來歸

王淵

字幾道熙州人善騎射累有功累遷熙河等路部將靖康初為真定府總管討平叛寇高宗即



位為御營司都統制後為劉正彥所害贈少保謚襄愍淵為將輕財好義家無宿儲

王文義

太寧人景德中其母疾篤別股進藥疾愈後母卒廬墓鄉人憫其貧日給之食墳去水遠

無以資洗滌祭奠器用感夢得泉人扁曰孝感泉事聞賜以衣襖

王琮

字宗玉世居錢塘紹興初避地來邑之邨曰永豐遂居焉登進士第宣和中任大宗正丞提舉

永興軍路常平靖康初自京西憲節被召除左司郎中後歷兩浙江東漕副以病奉祠琮篤於友愛賞延先一弟二姪而後及諸子子允功世科

王友直

博平人父佐以材武稱友直隨父游諳兵法紹興末金人渝盟友直結豪傑勤王得眾數

萬置都統制訓練進克大名欲南歸道拜天雄軍節度使後累立戰功積官至殿前指揮使卒

贈檢校少保

王倫

字正道旦族孫建炎初通問使使金被留不遣遂與未弁洪皓往黃龍府潛通意由是二帝始

知高宗即位倫往還于金數次後被拘之河間十年且欲以為平灤三路都轉使倫曰奉命而

來非降也先臣文正公以直道輔相兩朝今被留敢愛死以辱命乃自縊

王師道

字居中兗州人為人沈勇任吉州粟傳砦巡檢與盜戰每射輒斃追擊數里遇賊有伏於

居民之舍者挺身力戰遂死立廟其地部使者以聞官其二子

王宗哲

字廷俊長汀人初省試俱未第會朝廷責有司取人過額減百人宗哲亦在數中遂東歸

讀書絕意功名以詩酒自適至政和戊戌凡一十四年以恩沛復取所減百人廷對遂中甲科

累官灌陽令致仕歸初堂手植六柳號六柳先  
主與郡守張憲武為詩友更倡迭和年八十一  
卒

王炳

字景文南安人紹聖中第進士娶呂惠卿猶子  
避呂氏權十年不調後為沭陽令秩滿入都時  
蔡京當國登其門者通貴以炳與惠卿連姻囑  
使往見炳不往左授海陵丞而歸呂蔡之敗附  
麗者皆坐謫炳獨得全通判潮州  
改知汀州未上提舉洞霄宮卒

王沂之

字春伯晉江人以蔭知新昌有惠愛以曾祖  
秉嘗立義齋延儒師誨學者中廢沂之遺命  
子起震繼其志闢堂于家之南扁曰文雅列齋  
四捐田三百餘畝以贍師生真德秀表其閭曰

義塾

王柟

倫之孫初調海門尉孝宗時假右司郎中使金柟歸白其母母曰而祖以忠死故恩及子孫汝

其勉之毋以吾老為念柟至金和議遂決後柟奏和約之成皆方信孺將命之功臣因人成事

爾朝論多之累官知太平州

王忠民

穎陽人幼通經史靖康以來數言邊方利害屢召不至高宗南渡忠民依商號鎮撫董先

先事以師禮劉豫僭立忠民作九思圖以明天下之義紹興初特授宣教郎忠民以本心非求

名祿辭官遂不去

王輝

青州人靖康初應募立功官至巡檢使寓吉州茶寇犯邑郡以輝驍勇檄之使行至勝鄉地險

輝勇于進為賊所得以必加頸欲降之輝含血大罵遂被賊亂殺之事聞贈忠州刺史

王綸

字德言建康人幼穎悟十歲能屬文紹興初進士授崑山主簿累官同知樞密院事以資政殿

大學士知建康府綸嘗建言孔門弟子及後世諸儒有功斯文者皆得從祀先聖卒謚章敏

王臨

成安人閩論擬所應臨言契丹方饑困何能為然春秋許

與之義不可以不謹彼嘗求馴象可拒不求樂章可與不與俱皆有失今橫使求聖象豈可

與哉朝廷善其議累遷河北沿邊安撫都監後為寶文閣待制

王介

字元石吳郡人紹興初進士累官中書舍人會不雨乞冊免宰相史彌遠出知嘉興府改慶元

卒謚忠簡子玆嘉定進士累官禮部尚書奏陳剴切寶祐初拜端明殿學士進僉樞密院事

王南美

新化人宋開國勳舊王溥之後隱居伊溪桂巖博通經史尤長于易遠近學者宗之所著

有釣月臺耕雲堂集嘗置義  
庄以給孤貧稱為梅山高士

王居正

字明中揚州人少嗜學游太學司業王齊見  
其文曰王佐才也高宗時為起居郎後忤秦

檜出知婺州又奪職奉祠居正學根據六  
經楊時器之著詩書周禮辨學數十卷

王充

果州人遊黔南太守高請以訓黔之學者時黃  
庭堅被謫于州相愛二歲書以頌王之德曰南

充王子美其質粹溫文與之游  
見其循理而不競誠心而不疑

王彥

上黨人性豪縱喜讀韜畧徽宗時為清河尉金  
人攻汴彥慨然棄家求自試討賊時張所為河

北招撫使異其才擢都統制率裨將渡河屢破  
大敵紹興中以金均房安撫使知金州終知邵

州

王陶

萬年人爽邁善書翰第進士累官御史中丞後為翰林學士謚文恪

王寓

江州人父易簡資政殿學士兼侍講寓歷官國子司業中書舍人欽宗立累遷翰林學士尚書

左丞副康王使金因丐免降單州團練使并黜易簡建炎中賊馬進破江州易簡等俱被害

王阮

德安人少好學尚氣節隆興初進士對策極言宜遷都建康以圖進取紹熙中知濠州修戰守

具金人不敢南侵改知撫州韓侂胄聞阮名特命入奏阮對畢即出闕侂胄大怒批旨予祠於

是歸隱廬山盡棄人間事從容觴詠而已

王廩

字正臣開封人父珪康定間為將攻元昊死廟食鎮戎軍世傳忠義廩天資英特才貌奇偉

靖康初以馬帥領節建武總軍太原敵人寇并廩提孤旅由平陽應援屢奮奇畫式過奔衝九

攻九拒自春初迄秋未救者不至賊兵日滋宣撫張孝純欲亡歸敵廩謁孝純列必誓死降議遂寢圍久糧竭人相食幾盡同士卒煮弓弩筋膠以塞饑終不肯屈城陷與子閻門祇候荀入告原廟抱太宗皇帝御容抗辭罵敵俱赴火死追封安化郡王諡曰忠壯荀贈右武大夫恩州

史判

王以詠

字永言建安人第進士調和州含山縣邑數被兵以詠拊摩安輯為劉錡所知已而以岳

飛等論薦改秩知光澤縣累遷知衡州嘗誦昔人語云治公家如私家自符天理惜官物如己物乃合人情終其任未嘗妄費又不肯獻羨餘以求售官至朝散大夫

王喚

紹興十二年以右中大夫集英殿修撰兩浙路轉運副使除數文閣待制知臨安府正月臨安



言獄空詔獎之五月又言本府及錢塘九縣獄皆空詔獎之六月言太學將畢工食士之費常預備已括到民間冒占白地錢歲入三萬緡有奇養士三百恐可足用從之除工部侍郎

王廷珪

安福人舉進士調茶陵丞以職事忤上官拂衣而歸胡銓得罪貶嶺南親友無敢通問廷

珪獨送以詩流辰州孝宗召除國子監簿尋乞祠歸復召對時年九十餘賜坐勞問除直數文

閣所著有  
廬溪集

王蘋

字信伯福清人程門高第也寓居平江資稟清粹克養純固平居恂恂儒者及語當世之務民

俗利病若習于從政者紹興間守臣孫祐薦其素行高潔有憂時愛君之心召對賜進士出身除祕書省正字嘗為上言曰人心廣大無垠萬善皆備盛德大業由此而成故欲傳堯舜禹湯

文武之道擴充是心焉耳  
上善之官至左朝奉郎

王賞

當之弟舉進士累官禮部侍郎兼直學士忤秦檜意出知利州賞為文師蘇軾有玉臺集子偁學問該洽初除直祕閣知龍州有美政後為吏部郎中嘗撰東都事畧一百三十卷

王大寶

海陽人建炎初廷試第二差監登聞鼓院奉祠趙鼎謫朝大寶日從講學後知連州張浚亦謫居命子栻與講學尋改知袁州召為國子司業孝宗時遷禮部侍郎諫議大夫上疏劾宰臣湯思退主和誤國罪改兵部侍郎力乞祠後召為禮部尚書

王衣

字子裳歷城人以陰補官又中明法科歷大理評事林靈素幸有僧毀體然香衣閱律自傷者杖靈素求內批竄僧停衣官建炎初大理少卿韓世忠執苗傅劉彥正獻俘檻車幾百兩將盡

尸之衣奏自二人妻子皆少釋之又刪  
雜犯死罪四十七條召為刑部侍郎

### 王次翁

字慶曾濟南人廣西轉運判官時劇賊馬友  
孔彥舟曹成更據長沙帥檄漕司預鴛糧芻

三十萬以備調發次翁即以具報吏矜胎次翁  
曰兵未必發先擾民可乎吾以一路常平上供  
計之不啻三十萬已而賊不犯境知容州嘗募  
元結之為人取結在道州時乞免科率二奏刻  
之石并其遺像以便觀省  
且曰庶不墜元子之政也

### 王侯

字碩夫宛丘人年十六補太學生第政和初進  
士除太學博士擢監察御史建炎初扈從南渡

遂家餘姚召拜右司員外郎歷陞兩浙計度轉  
運使秦檜專國侯居家二十八年檜死起知明  
州召除戶部侍郎與廟堂不合除工部尚書言  
者乘之罷歸隨卒侯節行剛方為中興名臣子

述在人物傳亦  
有名于當世

王端朝

澶淵人過江愛溧陽風土因家焉少該博洽  
聞年未冠建康鄉舉第一及入太學又為第

一再中博學宏詞科歷太學  
錄祕書省正字終知永州

王庭秀

字穎彥慈谿人政和中進士嘗與黃庭堅楊  
時游操尚堅正文辭宏達歷官州縣累官殿

中侍御史論罷黃潛善後為  
左司郎中竟與宰相不合去

王相

如字次卿知微曾孫也孤貧嗜學年四十不娶  
或問之曰恐負吾學也呂右丞好問守宣州

得士四人詹友端李宏周紫芝及相如與焉每  
讌集必與四人者俱建炎初江右盜起被執逼  
令草檄相如奮髯曰吾雖死不能為賊作牒遂  
遇害盡室殲焉後僧毅達得其遺藁三百七十

餘篇周紫芝序

之號溪堂集

王衡仲

豐城人舉進士授新昌簿居官不詭隨尤善推類以得事情漕運使捕盜數十約至境誅

之衡仲按其事曰非真盜也悉縱之遣守建昌軍值大旱入境大雨如注郡人迎喜曰真刺史

雨也號柏軒

所著有文集

王克明

樂平人徙居湖州初得脾胃疾乃讀難經素問刻意用藥其病遂愈因以術行無不驗張

子蓋救海州戰士大疫克明全活者幾萬人不以爲力好俠尚義嘗數千里赴人之急累任醫

官紹興中

賜金紫

王信

麗水人紹興末進士累官給事中以能稱嘗假禮部尚書使金肆射都亭連中其的金人驚駭

曰尚書得非黑王相公子孫耶歸言金人必衰之兆有四在我當備之策有二歷知湖州紹興府鄂池州累遷煥章閣待制所著有是齋集

王剛中

樂平人紹興間進士第二累官中書舍人言禦敵必先自治高宗聽其言擢知成都府制

置四川恩威並著得將士惟心孝宗時累遷同知樞密院事卒謚恭簡

王罕

字師言本成都人徙家于舒以蔭知宜興縣累遷戶部度支副使知潭明州皆有政績以光祿

卿卒即王琪之父珪之季父也

王時敏

上饒人學有源流兼該體用老於田里有處士之風著師說及語孟中庸大學說并雜文

十卷未燬為作墓誌

王霄

信州人以貢士住辟雍者三年建炎初歸鄉潛德不仕年九十六歲衆推為鄉先生其妻吳氏

亦年九十餘郡守以聞霄授初品官吳授孺人

王復

以龍圖閣待制知徐州高宗時金人引兵圍徐州復與男倚同守城率軍民力戰外援不至城

陷復堅坐聽事不去尼雅滿誘之復漫罵求死闔門百口皆被殺事聞贈資政殿學士謚壯節

立廟楚州號忠烈官其家五人

王琦

為方門砦巡檢高宗時金人還自熙河琦禦之金人立招降旗榜改年號阜昌衆皆拜琦獨不

屈金人執而殺之

王忠植

太行義士也高宗紹興九年為建寧軍承宣使金人圍慶陽急忠植以所部赴陝西叛將

趙惟清執忠植使拜詔忠植曰本朝詔則拜金  
國詔則不拜惟清械詣慶陽諭使降忠植大呼  
曰我河東忠義人也將士勿  
負朝廷堅守城壁遂過害

王縉

字子雲分水人自侍御史遷右司諫知無不言  
每謂人才實難多事之際尤宜為朝廷愛惜以  
故不專彈擊而惟論安危大計與所以  
啓沃君心者高宗嘗以得諫臣體稱之

王綯

字唐公審琦五世孫建炎初為御史中丞金人  
入侵具陳攻守之策宰相不能用歷叅知政事  
同政者議不合求去御書霖雨思賢佐時清憶  
老臣十字賜之綯為人剛正有守立朝無所阿  
附號稱  
賢相

王悅

字習之莆田人紹興中登第性峭直孝宗立召  
見論不可講和甚稱旨除國子監丞兼吏部員



外郎出知衢州愷悌慈祥視民如子屬歲饑旱發廩勸分以給食竭誠禱雨絕不茹葷早晚一粥凡月餘日有乞為三日之霖願減十年之壽之句竟以是卒衆為立祠於徐偃王廟其喪出城號慟之聲震野外閩郡送至江山事聞贈直龍圖閣仍宣副史館

### 王定國

字安卿福安人少有大志紹興之末叩閣上邊宜十策高宗幸金陵復進十五事命從趙

端招撫山東張浚留致宣幕時海州為紅巾所據遣定國與魏勝收復之就攝判官兼州事改泗州推官隆興間陳敏知高郵辟定國為判官協力守城與虜兵凡九十三戰皆捷孝宗大悅特創高郵軍僉判以處丁內艱改舒州宰執列薦召對上謂大臣曰王定國忠義勇畧真英士也除知高郵軍政績甚著終朝奉大夫馬

王舜舉

祁門人舉進士通判信州時清溪洞方臘反舜舉伏兵大破之授朝請大夫直祕閣賜賚

甚厚尋除江東提刑卒贈大中大夫

王允

初字元甫永嘉人居千石登淳熙第歷知餘杭通判德安府開禧間值金人以重兵圍城甚

急允初率兵卒固守相持一百八日敵解圍去擢守本郡遣京西提刑北運使知鄂州召赴行在丁父憂卒諡忠敏曾孫漢老仕至明州倅宋亡誓不過江及入城市以壽終

王時叙

字伯倫奉化人第乾道五年進士歷嚴州遂安縣時郡守責逋於十年之外甚急時叙謂

從事曰邦侯素不困疲瘵之民何遽變更果爾罪去誠甘之守知不可奪遂已編修陸游為郡日縣上所斷大族爭訟僚屬咸會陸以遂安狀銜袖日得一好文字為諸公出之且讀且喜日

使諸邑皆如遂安吾輩可以  
卧治有文集二十卷藏于家

王格

字伯庸長汀人嘗與計偕恬於進取以授徒為  
樂少與陳軒厚善陳來守郡嘗割俸五十萬餽  
之格不受悉歸諸郡庠生且築功縣人共買田  
數百畝汀學有田自格始子宗哲明哲宣哲皆  
第進士濬哲貢辟雅格  
後以子貴累贈朝奉郎

王時會

字李嘉時叙之弟與兄同年進士自迪功郎  
七遷至湖南運管賜緋魚袋嘗知會稽值歲  
霖潦郡方督已蠲之賦甚急時會持不可守不  
聽乃袖告身易服立庭中守為奪氣民賴以舒  
會營永阜陵吏抱文檄如林環案立時會省去  
其十之七餘不可已者召民給錢粟與期民不  
知役而事悉集所至皆可稱述少旣意經學有  
易詩書論語訓傳鄉飲酒辨疑凡數十百卷文

辭簡古尤喜為詩有

泰菴存藁三十卷

王綽

字誠史永嘉人有氣節葉水心之畏友謝尚書  
汝談等在史館奏充編校而不就卒薛歸翁詩

挽之有水心文會已凋零猶有先生續典刑之  
句有春秋傳記及雜文門人尤端明焞薛祕書

蒙守建與括

皆為刊于學

王蒙

字叔明其先吳興人隱於仁和之黃鶴山號黃  
鶴山樵善詞翰畫學王維與吳興倪元鎮詩畫

名齊

王益祥

字謙叔閩縣人淳熙中進士及第調桂陽軍  
學教授與知軍陳傅良監贍軍酒庫吳獵相

友善紹熙中轉建康府學教授與知郡張杓安  
撫司幹官游九言為賓友修學校增生徒士風

丕變後以傅良杓等薦歷監簿編修說書出知寧國改處州時嚴偽學之禁因丐祠去號止軒後遭江東提刑以里人陳自強居相位引嫌而歸

王克恭

字彥禮南安人淳熙中進士第教授循州以理義迪後進講授不倦改知寧德縣以最聞

通判廣州海寇掠境力疾督師擒其首以徇辟知新州奏裁減丁米以寬民力秩滿除監登聞鼓院累遷度支郎官以祠歸起知興化在郡六月卒子道翁嘗補國子生知海陽縣

王質

字景文興國人博學能文著五十篇言歷代君臣治亂謂之朴論紹興末舉進士孝宗時言利

戰守之計後為樞密院編修官虞允文薦其鯁亮不回可為正言時中貴用事陰沮之遂奉祠

山居絕

意祿仕

王居安

字資道黃巖人幼有異質淳熙中舉進士為右司諫首論韓侂胄竊弄威柄宜肆諸市朝

以謝天下又疏言古今治本亂階更為倚伏遷起居郎兼崇政殿說書後以龍圖閣直學士知

福州卒贈少保居安宅心空

明待物不貳所著有方巖集

王十朋

字龜齡樂清人幼穎悟日誦數千言紹興中廷對忠鯁高宗親擢為第一累官太子詹事

以龍圖閣學士致仕卒謚忠文朱熹嘗稱之曰光明正大磊磊落落君子人也子二人皆篤學

自立聞詩知光

州聞禮知常州

王炎

歙人為潭州教授以薦知湖州炎為著易解未竟而病篤夜分祝天曰願須臾寬死以成此書

病少瘥書

成果卒

王師愈

字與正師心弟自幼穎悟知宗正學嘗從楊時受易論語既又從朱熹張栻呂祖謙游紹

興間登第官至崇政殿說書熹稱其有本有文德望隱然為東州之重云

王淮

字象海金華人幼穎悟力學紹興中進士為台州臨海尉郡守蕭振一見奇之許以公輔器以

薦除監察御史條奏自治之策高宗嘉嘆累遷翰林學士訓詞深厚得王言體孝宗時歷左右丞相兼樞密使卒贈少師謚文定

王明清

本汝陰人宋慶元間寓居嘉興官至朝奉郎有史才所著有揮塵錄及玉照新志

王鎡

池州人為中書舍人兼侍講未仕時旁郡受業者常數百人所著有紫微集春秋門例編解戚

里元龜易象寶鑑

王顯世

字子亦南安人侃之子也遺澤入官為興化錄參時有從官起家守泉與鄉士爭田守意

逢迎囑使為地顯世曰法與理是據門戶非所郵奪以歸士家一郡稱快受輸斛面卻不敢同

列為寄倉終更吏以數上顯世不顧改秩知寧都縣卒顯世書無不讀以詩鳴有容安彙十卷

王肱

字用輔晉江人為文好譏刺當世以是累舉不第嘗著濟狀一篇言濁河貫清濟濟詰其浼溷

時甚奇之又無題古詩一百三十首辭多悽惋

王胄

字希武永春人以春秋擢嘉定癸未省試第一教授惠州秩滿入為太學正遷博士禮闈較藝

諫官同典舉欲私所厚以險怪之題冠多士胄識其文曰必其人也典舉色沮易填次列而心

銜之揭曉以劾罷通判惠州歲餘卒於官



王伯大

福州人嘉定進士累官樞密副都承旨兼左  
司郎中進對言甚激切言邊事曲盡事情後

為刑部尚書叅知政事立朝以直  
諒稱終觀政殿學士知建寧府

王萬

浦江人嘉定中進士理宗時累官至監察御史  
彈劾不避權要以太常少卿致仕卒賜諡忠惠

萬忠伉有大志終其身行無不顧言設施  
論諫皆根于心史稱其為正人端士云

王用亨

字子安崇德人少孤事母至孝嘉定初舉進  
士志欲盡讀天下書手抄口誦至忘寢食鄉

之登任籍者多出其門作二記  
於座右以不欺不貪自警焉

王極

字全卿湖州人淳熙中為縣令律已清介洩事  
明敏差役公平獄訟清簡興學養士風俗丕變

王休

慈谿人攻戴氏禮慶元二年登鄞龍榜進士  
擢湖州教授改訓徽州遷祕閣授書判樞密院

事直躬立朝無所附麗嘉定末與柄臣不合遂  
謝事歸一日上忽思之遣使驛召時休已卒乃  
命定海鎮營葬休以文學著稱一時士類宗之  
若杜州童居易著作劉厚南右曹郎程士龍皆  
其門人晚歲文思益  
進金石文多出其手

王震

字定叟東陽人嘉定四年中絕倫異等喬行簡  
喜曰吾為朝廷得一帥才矣理宗即位出知濠  
州光州戰守有功再知高郵軍時議出師震以  
為莫若遣間探覘敵情如不得已然後行之否  
則無故自蕩其根本是外兵未至而內兵先憐  
烈也諸軍單行惟高郵遶之境內賴以安全由  
是與時忤乃撰沿江等邊誌一編上之尋知壽  
昌改蘄州嘗嘆曰兩淮藩籬也大江門戶也三  
輔堂奧也藩籬不固則門戶且危門戶既危則  
堂奧豈能久安乎嘗訓其子弟曰窮理盡性學

之本也又嘗曰士大夫當以世從道不可以道從世也有玉溪集行於世

王遂

金壇人嘉泰初進士為監察御史疏奏極論進君子退小人違右正言後以華文閣直學士知

隆興府召還授權工部尚書遂與劉宰素同志宰嘗稱遂為文雄健無世俗浮靡之氣云

王士奇

字永叔福安人初以鄉薦赴省試聞弟達州教授知章訃不赴廷對即往蜀護其喪以歸

凡六年而後就試當得官以母老丐祠當國者高其行畀以堂除凡二十三考方注莆田法曹真德秀嘗語當路曰王法曹文行俱美尤孝於親當於古人中求之後以奉議郎賜緋衣致仕優游田里手不釋卷嘗書其門云立行孰先須孝悌傳家有後是詩書卒年八十四所著有諸經釋疑諸史節畧及宜拙平心集藏于家

王漢英

字彥古奉化人受業迂齋樓昉文行不凡時鄭丞相應學士皆樂與之友登淳祐元年進

士第魁梧爽朗朝列偉之少聘徐氏女因鼻病腐以貌自誓不嫁父母辭曰公盛年高科不患

無良配不敢以辱公漢英曰女有疾非漢英誰適既婚相敬如賓後為國錄妻沒終身不畜婢

王宗道

字與文奉化人嗜古人之學窮眇討幽時出其奇見人多稱之第嘉定元年進士為江東

提刑司幹官所著有易說指圖十卷二禮說七卷書說六卷觀頤悟言一卷讀書臆說十卷雜

錄二卷聞見因筆二卷淮鹽論二卷詩文五十卷

王蘭

之道子乾道中進士累官至叅知政事樞密使孝宗嘗曰磊磊落落惟卿一人光宗時嘗應詔

上疏願先定聖志條列八事以聞蘭盡言無隱然嫉惡太甚以故同列多忌之所著有奏議

王必大

尤溪人性至孝紹定初除漳州通判累官至朝請大夫尚僕安懿王女事父母一飯必躬

視與其兄必學必讓極友愛嘗做范文正公例以郭外田五百餘畝創義庄以資族人冠婚喪

葬之費又設義塾延師以訓族里

子弟子四慈恭勤愨皆登進士

王邁

字實之仙遊人號曜軒從真德秀遊嘉定丁丑進士甲科為端平中祕書省正字史嵩之將復

相極言嵩之姦險刻薄不可用輪對論君不可欺大臣不可欺君厚權臣而薄同氣此欺天之

大者理宗為動容出漳州通判裡祀雷雨應詔上言麴蘖致疾妖冶伐性隱刺覆絕做煇尊寵

此天與寧考之所以怒也陛下方冊免三公逆相崔與之恐與之不至政柄他有所屬於是言

官李大同蔣峴希意論之補外徙知邵武軍亢旱應詔驛奏七事以撤龍翔官立濟王後為先

終朝請大夫特  
贈司農少卿

王震孫

播州人端平初元兵犯蜀震孫率眾戍蜀口  
解難息民事聞授從議郎崇慶路兵馬鈐轄

王撝

字謙父開封人登嘉定進士同年余天錫叅知  
政事屬教其子弟歲終致束脩以謝堅辭不受

曰吾二兒習詞學鄉里無完書願從公求尺牘  
丐借周益公傳內翰番陽三洪公暨其餘習詞  
學者凡二十餘家所藏書余欣然許之後二子  
俱中詞學科為安吉丞攝令長興遷國子正將  
作監主簿時丞相史嵩之預政乞補外以避通  
判婺州遷吏部郎中兼崇政殿說書嘗預修四  
朝史為輿服志六卷  
後直祕閣知温州

王與之

字次點樂清人從松溪陳氏學盡傳六典要  
旨遂著訂議八十卷郡守趙汝騰進之朝云

與之踐履無玷守節不踰皓首著書真經明行  
修之士其書精粹可裨聖明之治遂授賓州文  
學終通判泗州  
年九十七卒

王持庠

字載仲樂清人在太學曾率六館叩閣論史  
蒿之士論推重登淳祐第八浙西帥幕從官

薦丁大全而持庠謂其內懷姦詐外示狂率使  
其得志必為國家憂大全聞之憾焉後以著作  
兼左曹郎吳潛罷相持庠輪對言於理宗曰率  
相進退人材當進賢退不肖不當以用舍快恩  
讐潛貶爭之力罷歸賈似道怨潛甚疑持庠黨  
潛併惡之由是十五年間三被擢不越郎曹二  
典郡皆不終似道敗始  
除大理少卿未上卒

王應麟

字伯厚鄞縣人九歲通六經學問該博為文  
敏捷淳祐初進士官至翰林學士禮部尚書

所著有地理考困學記  
聞玉海等書行於世

王文雍

寶祐四年五月以通直郎至六年六月準省  
割除提領戶部擣賞所主管文字重修譙樓

置刻漏修頌春手詔興復縣務創兩務官廳重  
浚縣前河并福山塘砌承流門并慧日寺前街

建寶祐新隄修承流

門秋報門修明版籍

王登

德安人少讀書曉兵法慷慨有大志淳祐中進  
士調興山簿以母憂去制置使吳淵具書幣招

之登即長揖出門即見淵為節制竟立奇功威  
聲日振為忌者所讒以是才畧不能盡施識者

惜之

王翊

郟縣人寶慶初進士吳曦嘗招入幕及曦叛抗  
節不拜為陳大義不聽嘉祐初制置使丁黼辟



叅議官元兵至翊與司理王榮等募兵拒守元兵入翊朝服危坐尋赴井死轉運使蒲東卯亦

之死

王爚

字仲潛新昌人嘉定初進士累官左丞相兼樞密使德祐初進平章軍國重事辭不許以言者

罷平章授觀文殿學士以元老入相值國勢危亡之際天下所屬望也卒與陳宜中不協而去

王埜

字子文婺州人介子嘉定進士淳祐間歷官兩浙轉運判官以訪察使出視江防由嘉興至京

口修官民兵船守險備具江上晏然拜端明殿學士與宰相不合言者攻之主管洞霄宮

王應鳳

字仲儀鄞人與兄應麟講矻矻忘寢食為文根柢左氏班馬淳祐十一年廕補將仕郎

明年登文天祥榜進士監通州狼山稅寶祐間廷對以甲科第九人賜第學益淹貫應開慶元

年博學宏詞歷官至主管機宜文字尋除軍器  
監丞時應麟方學制以鹽改差淮西制置司叅  
議官未幾文天祥薦其學宜職翰墨除太常博  
士以終壽四十六所著有默齋藁及訂正三輔

黃圖  
諸書

王侃

字仲和炳之孫歷肇慶糾曹倅王衣倅商人數  
百名以為盜分圍鍛之將為功侃持不可倅適

攝郡事督成愈急會移獄廣東帥親讞如侃  
言破械釋之知漳浦縣終更得通判福州卒

王泰來

華亭人性剛介不為柔從蚤以詩名寶祐開  
慶間元至元間召至京世祖與語持正不回

欲授以官懇辭乞  
歸所著有詩集

王昌世

字昭輔鄞人尚書應麟子恩補承務郎未及  
祿而宋社已墟尚書公杜門不出朝夕坐堂

上取經史諸書講解論辯昌世甫十歲怡怡聽受無倦殊聞異見靡不究悉尚書公所著述昌世蒐輯考訂贊助為多蓄書萬卷燬于火露抄雪纂至忘寢食書以復完尤精於易筮占驗如

神性至孝友

王炎午

安福人名鼎翁為上舍生會天祥舉義兵乃杖策謁見尋以母憂家居而天祥被執鼎翁為生祭文以速其死隱居不仕所著有吾文豪

王栢

字會之金華人氣稟雄偉勇於求道欲以身任天下之重初號長嘯一日讀書至居處恭執事敬惕然曰以長嘯自命此非聖門持敬之道乃更號魯齋德祐間賜謚文憲有讀易記及文集傳於世

王大壽

為左翼隊將理宗紹定五年海寇王子清犯圍頭守真德秀遣大壽領卒百人防遏猝與

賊遇奮前控弦斃賊十餘後無援者遂沒從死者五人賊就俘剖心祭之

王夢應

攸縣人咸淳中進士調廬陵尉元兵陷臨安夢應率同邑吳希奭陳子全起兵勤王馳奏

疏聞又遣使通桂帥遂復袁州兵敗走已而希奭子全俱死宋亡夢應收合潰卒奔永新依顏

明叔闔門疫死

王安節

堅子度宗時兄弟五人皆受官安節為東南第七副將駐兵江陵即走臨安大兵攻常常

城素惡安節集柵以守相拒兩月不下元丞相巴延自將攻之屢招降不下麾兵破南門安節

被執有求其姓名者安節呼曰我王堅子安節也降之不得乃殺

王山

蜀都統幼主時守涪州攻圍無虛日勢援孤絕宋亡之二年城始破仙自刎斷其吭不死以兩

手自摘其  
首墜死

王士敏

慷慨不撓幼主德祐末北軍至境被執題其裾云此生無復望生還一死都歸談笑間大

地盡為腥血汙好收吾骨首陽山臨  
刑嘆曰恨吾病夫聲不能大罵耳

遼王鼎

涿州人博通經史時馬唐俊有文名適上已與鼎被楔水濱因飲索鼎賦詩鼎援筆立成唐俊

驚其敏妙舉進士累官翰林  
學士當代典章多出其手

王金王去非

平陰人嘗就舉不得意即屏去督妻孥耕織以給伏臘家居教授束脩有餘輒分惠人弟

子班忱貧不能朝夕一女及笄去非為辦資裝嫁之比隣有喪忌東出西北皆人居南則去非

家去非壞蠶  
室使南出

王廣道

平陰人有文學不求任進鄉里化服號為醇德先生党懷英尤亟稱之從弟求道文學與

兄齊名大建間以  
醫試第一入翰林

王毅

大興人第經義進士累官東明令貞祐末東明圍急毅率民兵願戰者數十人拒守城破率衆

抗戰力窮被執縣人王八欲降之毅厲聲曰忠臣不事二主驅毅者以刀斫其頸不屈而死

王元節

弘州人祖山甫父翊皆仕遼元節天德初進士雅尚氣節仕為密州判官既罷即以詩酒

自娛號曰遼齋弟元德亦登進士為南京  
提刑使有能名孫國綱累遷監察御史

王德元

邢臺人大安中舉經童第二人既受官避兵於許許人以為師出其門者數十百人為人

愷弟悫厚與人言必本於忠信許人化之及卒為立祠于學以祠之

王競

彰德人以陰補官天眷中試館閣競文居首累官禮部尚書翰林學士承旨修國史競博學能

文善草隸書作大字兩都官殿榜題皆競手筆士林推為第一

王庭筠

蓋州熊岳人早有重名大定間甲科登第詞翰文采照耀一時官至翰林修撰晚愛鄆州

黃華山下居其下號黃華山主有文集傳世子曼慶仕至行尚書省左右司郎中

王浩

哀宗時為扶溝令時民多執縣官送款于元以浩為恩不忍加办勸之降不聽于是殺之棄屍

自春徂夏儼然如生鳥犬不敢近如有神護者

王修

涿州人第進士歷知霸州及大興府性剛毅臨事果斷吏民憚其威累遷至戶部侍郎承安間

大興知府缺金主諭宰臣曰  
可選極有風力如修者為之

### 王泉

字巨源浚人少慷慨膂力絕人貞祐末河朔兵  
關民聚黎山自保泉推泉為柵長後遷廣威將

軍權同知滑州軍州事元光秋七月闕  
捷聞詔進  
馬西泉馳梁奮擊臨陣殺七闕

昭武大將軍滑州刺史繼授鎮國上將軍濬滑  
開三州招撫使北兵歲入至相戒曰黑小二戰

甚銳其鋒未可輕犯以  
泉面鐵色故軍中目之

### 元王詢

義州開義人武力絕人善騎射嘗行凌水濱得  
一古刀嘗佩之每有警必先鳴故所向皆捷金

末歸蒙古穆呼哩累官至兵馬都元帥鎮遼東  
為政簡易為當時所倚重子榮祖官至招討使

儀形魁傑  
望之若神



王約

其先汴人徙真定風格不凡博覽經史文辭至元中擢國史院編修官遷監察御史首請建儲及修史累官集賢大學士卒年八十二約平生著作有史論高麗志潛丘橐子思誠官至著作

郎

王守道

平山人金末兵興宣撫司署守道為縣尉改主簿史天倪鎮真定以為府經歷及金恒山公武仙殺天倪守道志復讐卒逐仙遁去後擢慶源軍節度使卒追封壽國公

王巴延

雷化人授福建轉運副使冠至募兵扼險擊敗之後因馬仆見執賊帥王善曰聞公有惠政為我尹此州可乎巴延大罵竟不屈被害事聞追封太原郡侯

王玉汝

鄆人少習吏事耶律楚材見而奇之元初授東平路奏差官遷平陰令有惠政累遷秦定

軍節度使以病謝事杜門日以經史自娛強起  
為行臺叅議視事僅五六日裁畫署置煥然一  
新

王閔

須城人父老而貧不甘淡薄每食必需魚肉閔  
勤苦營奉無闕甚得歡心父嘗卧疾然長燈室  
中火焚壁間閔聞大聲驚起馳救烟燄已蔽寢  
戶閔突入抱父出肌體灼爛而父無少傷中統

初復  
其役

王恂

字敬甫唐縣人父良明理數之學恂讀書過目  
能成誦仕為太子贊善每侍講讀必發明三綱  
五常之道及歷代治忽興亡之故嘗與許衡郭  
守敬等定授時厯累官至太史令卒贈司徒追

封定國公  
諡文肅

王忱

字允中幼讀書明敏有才識平章趙璧引見裕宗潛邸語稱旨命為宿衛掌錢穀稱職復授山

北遼東道提刑按察司副使時駙馬馳獵蹂民田忱以法繩之又建言裕宗曰陛下春秋高當早建儲嗣又省部內以正軍餘田士卒衝冒寒暑遠涉江海宜加優卹皆從之士臣被獄久不決者忱志正之及被誣劾罷鎮南師帝繫忱至京師得面陳其事帝大悟始釋復起忱為肅政廉訪使至大三年拜中奉大夫叅知政事未行卒

王文淵

字巨卿自幼失怙能自樹立嘗推擇為吏厭而棄之從學于滕安上益自克勵遂淹貫經

史色養於親友弟訓子家庭之間肅如也作詩紆徐冲澹得韋柳體為當代名公雅重竟不仕卒於家鄉人稱之曰貞孝先生

王結

定興人少聰慧讀書數行俱下從太史董朴受經深於理學累官翰林學士中書左丞卒封太

原郡公謚文忠故相李珪曰王結非聖賢之書不讀非仁義之言不談時以為名言所著有易

說及文集十五卷

王義

寧晉人深沉有膽智讀書知大義金末盜起河朔縣推義為長太祖召為武安軍節度行深冀

二州元帥府事義乃布教令招集散亡勸率種藝深冀之間遂為樂土

王思廉

獲鹿人師太原元好問世祖時累官工部尚書翰林學士承旨嘗進讀通鑑至唐太宗欲

殺魏徵語及長孫皇后進諫事帝命引至皇后閣講延其說時稱為儒相卒追封恒山郡王謚

文恭有文集

王伯勝

文安人為遼陽等處行中書省平章政事治懿州增郡學弟子員擇書教之又度閭田募

民耕種以廉饋之召拜大都留守遼陽民乞留不報皆涕泣而去及卒追封薊國公子恪官至

工部尚書

王利用

通州路人世祖徵為太子賓客首以敬天法祖孝親仁民十餘事為勸帝嘉納之廉希憲

嘗語人曰方今文章政事兼備者利用其人也

王珍

南樂人慷慨有大志任為行營軍前都彈壓會宋將彭義斌取大名珍棄妻子間道走及元兵

破大名珍謂其妻曰吾非棄汝輩誠不以私愛奪吾報國之心耳後以軍功累授本路征行萬

戶子文幹累官東平總管

王鶚

東明人幼聰悟日誦千言長于詞賦金正大初進士第一授應奉翰林金主擢左右郎中後世

祖聘至進講孝經書易及治道每夜分乃罷及即位首授翰林學士承旨後致仕歲給祿有大

事遣使就問卒諡文康

王克敬

大寧人幼奇穎孜孜力學元統初為江浙行省參政年五十九即請老謂人曰穴趾而峻

壟必危再實之木必傷其根無功德而忝富貴何以異此其歷官所至俱有政績可紀所著有

詩文奏議卒諡文肅子時官至翰林學士承旨

王薦

福寧人性孝而好義父嘗病甚薦禱於天願減己年益父壽父果延壽十二年母嘗病渴思瓜

時冬月薦至深嶺值雪仰天而哭忽巖石間青蔓離披有二瓜焉摘歸以進母渴頓止又為人

置後治喪立義阡贈棺  
賑粟官上其狀旌之

王積翁

福寧人初任宋為福建制置使宋亡積翁上  
閩圖籍元世祖授中奉大夫累遷刑部尚書

轉江西行省叅知政事奉使日本至其  
境遇害武宗時追封閩國公謚忠愍

王都中

積翁子以父功授平江路治中時年十七遇  
事劄析動中肯綮僚吏皆聘貽不敢欺累拜

浙江行省叅知政事卒謚清獻都中歷任四十  
餘年其清白之操得于家傳而治郡之績雖古  
循吏無以尚之  
自號本齋有詩

萬姓統譜卷四十四